

羅氏族譜卷十六






中華民國二十一年歲次壬申重修

高明羅氏族譜

二十三傳孫
曉楓拜書





高明羅氏族譜卷之十六

墓文

太祖宋孝廉美公暨邵氏墓誌

樟木樹古墳乃羅姓始祖美公之墓也在高明孔堂鄉山后半岡之處
氣脉攢聚樹木葱鬱面二童山水繞拱俯臨平原浩浩蕩蕩氣象宏廠
洵佳城也余秉鐸斯邑未獲躬履其地然閱羅氏家譜備知其詳蓋宋
時美貴祖由南雄珠璣里遷居新會萌底始入高要墾田卜居於孔堂
岡背之陽遂家焉是時卜居未久人丁無幾適美祖仙遊不能遠尋吉
地遂將其骸安厝樹頭下當是時倉卒播遷非擇而取也而竟獲吉地
豈非天之啓羅氏哉厥後美公子孫散處鄉邑未有封土僅存一樹頭

爲棲骸之所夫樹頭非金石也風雨之所蝕霜露之所侵牛羊足跡之所踐履何以歷七八百年而不敝夫亦可以知其墳矣英靈所鍾不可磨滅自然之理也且匪直此也自美公卜遷以來子孫益繁不下五千人科甲亦代起明朝則黃裳公煥章公兄弟同榜後黃裳公登甲榜官至貴州按察使煥章公尹龍溪陞荆府審理正咸有治績光誌乘

滿清以明通進士而任樂昌教諭則有若天恂公以鄉榜任黔江知縣則有若緝公他如明經秉鐸佐雜膺職者不可殫述皆美公之遺裔而樟木之所發祥者也嗚呼豈非天哉天之所啓不可廢也可聽其落寞哉厥後子孫集議修墓請撰於余余與其賢裔交遊欽義舉景高風樂道其盛於以知福蔭有自且垂裕無窮也拜首而爲之銘

銘曰 樟木深根 祖墓常存 族昌而熾 文人蔚起

修之築之 子孫篤之 於斯萬年 福祿宜之

己酉科舉人肇慶府高明縣儒學訓導加三級年家眷晚生范黃琮頓

首拜撰

太祖美公暨邵氏重修墓誌

樟木樹頭之墳乃諱美公之墳實爲高明羅氏始祖地也由來舊矣家


乘所載宋時有美公者與兄弟六人自廣州來孔堂明年兄弟分居散處久莫可稽而美公獨留孔堂遂家焉當是時子孫微甚美公卒子孫不能擇地而葬姑以其骸寄諸村後樟木頭下非擇而取之不得已也誰知天之所以祐我羅族者其在斯乎後因世遠而末益分未及修葺


迄於今數百年矣樹頭如故也祖骸無恙也子孫繁盛計不下五千人
科甲亦代興元以前無論矣在明則有若黃裳公以甲榜官至按察煥
章公以科榜而尹龍溪應中公以歲貢而陞知縣在滿清則有天恂公
以明通榜而任樂昌教諭縝公以科榜而蒞任黔江由恩拔副貢而秉
鐸各邑者指不勝屈人咸以爲此地之鍾靈云奈無營業貯蓄而分居
者又各祖其祖是以墓所零落拜掃缺如甚非木本水源之爲也嘉慶
甲戌秋乃集各房子孫酌議派銀修建其樟木古跡所存不可沒也外
則砌以磚石築成墓塲正坐向豎碑記以垂不朽庶幾歷久彌光福澤
綿延也公之善行生終代遠年湮無可考不敢妄爲附會其諱曰美今
卽仍其舊云爾祖墳坐巽向乾兼巳亥

丁巳歲貢敕授修職郎惠州府河源縣儒學訓導兼理教諭加三級齋

孫雲頓首拜書

嘉慶十九年歲次甲戌仲春穀旦闔族重修





孔堂進朝馬山圖



高月羅氏族譜

卷十六

墓誌

四

廣州光華商店承刊

高田縣志
卷一
右孔堂山圖迺太祖美公考妣合墓由宋迄今經葬六百餘載坐南向
北壙內有樟樹頭久而不磨現存高壹尺八寸上尖下濶壹尺二寸木
質氣味馨香可愛而羅氏大宗祠始於道光十二年買地創建深兩大
進今上蓋雖廢其牆垣如故茲特誌之俾後日之復修者有所本云

岢

光緒三年歲次丁丑

廿一傳裔孫其照繪圖并誌

始祖宋鄉貢朝端公暨符氏合葬墓誌

公

諱

朝端乃美公之後宋淳祐間由鄉貢出任德慶府同知潔己愛民

卓有政績咸淳初

太祖美公由廣州新會蒞底卜居於孔堂隨後我

祖遷居員岡遂爲高明羅氏始祖焉妣符氏宜人與公同葬于皂幕山
土名雙門笋又名黃茅壁坐寅向申兼艮坤之原嘗聞古人以士之遇
合其要有四焉才位時命也昔尼父有才而無位其道不行賈生有時
而無命終于一慟我祖才不謂不長位不謂不重乃竟賚志以沒雖然
得所藉手當路亦不能盡行其道使其抱負顯於當時獨非時命所限
耶然積厚者流長根深者葉茂此理之常也自宋珠璣里南遷以來迄
今子孫千億仕宦勃興何莫非公之積德累仁有以貽留於後者哉前

代封塋于茲亦惟有歷年矣墓所毀頽所當修理現值歲次辛亥爰集
宗衎合議酌派經費於是乃諏吉修建次第興工茲將簽捐人名及進
支數目刻之于石以垂不朽

峕

嘉靖三十年歲次辛亥吉日闔族重脩

圖復始祖朝端公山記

我祖諱朝端公葬於明鶴交界雙門笋以祖嘗微薄墳就荒頽嘉慶年
間有際村房德隆者搏獸於墓旁土人稱此地爲羅朝端山則地以人
名矣進而視之古壙依然殘碑猶在四面萬山朝拱誠開族名墓也歸
而語之族屬凡未登臨者皆雀躍恨晚次載聯子姓以掃墓突見有侵
葬者訪確與之理論而鶴山客籍余亞斗豺狼成性拿我族人混送該
縣我族紳赴鶴山縣陶公尹理訴亦獲親勘明若觀火適離任案沉而
山所遠涉在客籍門前無可如何也猶幸天道昭彰客籍家產大耗死
亡幾盡乃懼禍遷棺仍賣墳種毒分災於石門賴亞福兄弟夫以侵葬
大夫職墳致財散人亡然後挖棺賣墳彼亞福者乃明知故犯欲以身

繼其災真慙不畏死愚中之愚也賴既買墳遂平我祖墓直侵入壙未

幾則產業耗盡瘋疾纏身亦有悔過於心爲龍聞其風曰機可乘矣咸

豐三年九秋同房弟錦榮并族屬一二覓墓所道由塘窩村左行不四

五里入谷口則高山峻急壁立千仞石齒峭厲瀑布奔騰下有清泉自

谷底長流幾處石門關鎖詢諸途人則曰數十里流來水經羅朝端山

下也龍雖不言意謂此其所以爲我祖朝端公之墳也乎自谷口由山

腰披荆棘約三十里有石巍峨石下民居二三家延入草堂依禮奉茶

詳問其地亦歷落指點曰屋后岡名黃茅壁卽雙門筭也入半山則羅

朝端山今已爲我客籍賴氏祖墓矣龍聞而含淚不敢發聲乃陟高岡


造塋域遠而望之有小穴砌以磚石視其碑曰仁生賴公之墓爲龍一

見怒氣冲冠眼花迷亂大聲而疾呼曰鼠竊狗偷之輩乃敢以穢體廁於我先大夫之堂我祖九原之中以之爲奴僕耶以之爲盜賊耶嗟乎以數千百口不肖孫曾飲酒食肉於天地之間日事峻宇雕墻安眠貼席乃任祖墓湮沒被賊掃平佔據未知骨骸存亡言念及此眞豺獺不如罪通於天矣泣下沾襟從旁兄弟亦皆淚下收淚徧覽山勢出羅經照之則三台側落跨龍枕官對面官星有情催官外有秀峯特朝龍經丙午丁一脉而來艮寅落脉卽可作坐寅兼艮云歸卽托塘窩村宗兄挺南通風願送回原價求情賴氏其長子亦已首肯而次子尙怙惡不悛臘月再往荷村求宗弟文藝代爲理勸越明年又與族兄廣進建隆輩備酒醴祭墓地時則愁雲四布山色迷離若爲我輩增抑鬱之態者

瞬息則霖雨將至夕陽依然世謂山川亦爲人愁良非謬也祭畢依依墓左適有一客民少年者至口稱賴棺葬羅公之左羅墓在賴氏之右星夜遄回時近晦朔螢火爲燈傘柄作眼每遇巖石岌巖匍匐而行然雖深夜涉泉攀石猶獲祖宗福蔭各無傷損夜半出谷口乃借宿村落焉時有賴亞祥者賴之主事人也亦知佔墳悖理謂墳必還主而亞福兄弟亦曾發見良心云云龍乍聞此語喜不目勝竊謂祖宗之靈事或有濟矣乃適紅賊滋擾音問不通繼而六縣客匪作亂而事中止焉且夫陰之有窀穸猶陽之有宮室也陰人靈爽之聚散久暫視其生前之德澤與孫曾之盛衰故凡神明有功德及人能捍災禦難則人爲之立廟亨祀其祀之者愈衆而神之靈愈顯其較然也我祖以鄉貢而任德

慶府同知其行修其德播是以歷千百年來子孫繁庶科甲鼎盛功名仕宦綿綿不絕若非根深蒂固精靈顯赫疇能若此况堂皇大雅之府豈容野老村夫狡謀侵佔逞刁強霸以與我爭此土地意先祖逆料邇來士人氣數蹇滯即使驅逐仁生恐有兇徒再謀侵葬故暫容其看守門戶以俟太平亦未可知也昔朱氏遠祖制置墓所被佔以文公顛理乃復其舊羅岸始祖宸公墓亦被沒以一中間關乃得其骸自古賢人君子於祖宗宅兆艱難辛苦若此古人豈好爲其難今人何可易視爰自茲以往其賢肖子姪宜遠師文公近法一中毋空抱此式飲式食之軀以枉生於羅氏之門也

咸豐九年歲次己未裔孫爲龍謹誌



始祖朝端公山圖並序

按我羅族始祖諱朝端之墳在皂幕山雙門笋土人呼爲黃茅壁又名

爲羅朝端山地以人傳矣葬於宋末年間背枕皂幕龍自南方丙午丁

一派而來三台落脈脈從右膊而下跨龍枕官形艮寅氣入穴坐寅向

申兼艮坤祖墳初被大水坑余阿斗侵次被石門賴阿康侵祇留一墳

頭存些碑石而已自與余慶堂結訟後每往拜掃屢被余姓恃地近強

橫逐我族人故清明多失拜掃之禮惟重陽節際村近地三五人由塘


窩嶺頂攀草而下拜之自客匪亂後而高明全縣土人被逐窮谷之祖

墓更乏人拜掃料賴康之平毀更甚矣因恐祖墓遺失故將山形繪明



以待後之賢者

峯

咸豐十年寄居高要廻龍裔孫爲龍特繪山形于左



廣州光華商店承刊



右圖乃大宋鄉貢任德慶府同知諱朝端公係高明羅姓始祖也此地高明鶴山交界同治七年經官立石分界祖墓屬在高明石界內土名雙門笋又名黃茅壁山形美女照鏡騎龍枕官格坐寅向申兼艮坤之原

光緒三年丁丑仲冬重刊

三世祖萬全公墓誌

公諱萬全敕贈修職郎係高明羅族三世祖廼始祖由鄉貢任德慶同

知諱朝端公之孫二世祖諱滿公之子也淑配楊氏敕贈太孺人生二

子長義有孝廉任江都教諭次善有孫丑曾孫文僖文禮文遠立孫慶

善福善惟善公好讀書力積善居家時奮然有整躬率物之行及隨祖

父出仕州有弊政妨民者佐理力除煩苛以利物濟人爲己任由是德

化宜民頌聲載道余生也晚不獲躬睹盛事迨癸酉至丁丑屢設帳於

羅家祠與太府灼齋翁訓導綱齋翁同知炳南翁晨夕晤言談及令太

祖德政甚悉余低徊往復爲流連不置者久之夫水之積也不厚則負

大舟也無力德之積也不深則煥鴻福也亦無光公以盛德厚積於數

世之前遂以鴻福疊享於數傳之後而子孫之掇巍科登仕版世代不絕迄今膺三品授同知或振高州之鐸或任副總之司實繁有徒其食餼天朝名噪膠庠更未盡縷觀則天之所以報公而大其門閭者豈其微哉公與淑配楊氏葬於新松岡坐坤向艮兼未丑之原是爲序

光緒三年歲在丁丑邑人生員甲子科備中姻晚晚生劉子楨頓首拜撰

六世祖文遠公墓誌

公諱文遠廼宋

誥授奉政大夫任德慶府同知

諱

朝端公之六世孫

五世丑公之子生質聰穎秉姿孝友持身嚴正接物寬和故事父母先
意承志待兄弟視如手足鄉人有難則量力以週之鄰人有善則留心
而記之憫人有過則維持而調護之一時族黨皆稱長厚焉公配譚氏
孝慈淑慎恭儉自持勤勞并著積德若斯宜天眷顧善慶無疆十一世
以後孫曾雀躍奕世簪纓科名仕宦不斷而壽寧山陰宜春同安河源
各學大振司鐸龍溪黔江橫州荆府各州縣特建殊勳蒼生永賴所謂
根深葉茂積厚流長者乎今者支分派衍十一世虛川公平川公分居
城內十三世守昌公裔遷柑園十六七世長人公等又遷居蛇塘濟濟

高明縣志 卷之六
孫支卓卓超群將來發祥正未艾也公葬洞尾牛圍山坐南向北之原
配葬員珠岡生子惟善孫閏住曾孫欽貽贈承德郎玄孫組勅封儒林
郎予自同治七年冬秉鐸是邑因與綱齋博學交好適綱翁掃墓而回
說及墳未有記囑記銘於予予因思德厚而流自光更卜地靈而人益
傑爰爲之銘曰

惟天至精

惟地最靈

龍盤虎伏

早結佳城

惟公積德

遂賜福人

池開頂上

砂穴有情

朝峯卓立

水抱洞滌

金鐘鎖水

玉印圓明

螽斯衍慶

瓜瓞英英

家聲大振

雁塔題名


署高明縣儒學訓導新會盧瀾清頓首拜撰


同治六年歲在丁卯

吉旦

裔孫

重修





六世祖文遠公配譚氏墓誌

太孺人譚氏乃羅文遠公淑配員岡東方人也生而積德滋多沒則流芳百世葬於員珠岡坐丙向壬兼己亥之原乃員岡城內柑園蛇塘各鄉祖墓同治甲戌歲予掌教邑之義學與廣文綱翁素好囑墓誌於予予不揣固陋因之有感焉人惟積德綿遠垂澤於以孔長聞之太孺人事翁姑則孝相夫子則順待子姪以慈處娣妯以和且也衣服儉樸持家勤謹一時鄉里嘖嘖交稱是太孺人之積德滋多也夷考其孫曾簪纓奕世繼繼繩繩而知太孺人之垂澤孔長焉十一世孫煥章以舉人而任龍溪縣知縣陞荆府審理正十二世孫儀以歲貢而任同安縣訓導侃以萬歷歲貢復中副榜十三世孫守昌以歲貢而考授縣丞十四

世孫知方以武庠而任陽江營防守遊擊十五世孫文燦以歲貢而卽用儒學日昇任本邑城守調署陽春縣城守十八世孫纘以舉人而任四川黔江縣知縣十九世孫雲以歲貢而任河源縣訓導二十世孫爲龍以歲貢而卽用訓導二十一世孫源由廩而中甲辰恩科副榜綿綿奕奕多士如林其間廩增附監職員指不勝屈此固太孺人積德孔厚有以致之乎予觀其子孫之昌盛益信太孺人之積德貽謀遠且大也烏能不發潛德之光而作閨範之則歟爰爲之誌

峕

光緒元年歲次乙亥仲秋穀旦

南海縣舉人揀選知縣蓉舫游人鏡頓首拜撰

七世祖惟善公墓誌

公諱惟善乃始祖朝端公之七世孫也世居員岡勤耕課讀廣積陰德

享壽八十有三歲葬於雲同逕山頂坐亥兼乾配邵氏安人塋於三頂

岡乙向其生終年月湮沒無存矣夫歷代之祖墓賴碑記以常存我族

蒸嘗微薄墓乏碑記是以子孫雖至祭不知某墓爲某世之祖考及妣

同治十三年甲戌修族譜對閱查核將各墓而封之碑惟此碑則統爲

記載始祖朝端公任德慶府同知妣符氏宜人合塋黃茅壁坐艮向坤

騎龍枕官格二世祖滿公妣夏氏孺人合塋珍坑山頂三世祖萬全公

妣楊氏孺人合塋新松岡四世祖義有公妣陳氏孺人陪塋三世祖墳

之下五世祖丑公塋道塘山妣劉氏孺人塋岑水金釵窩六世祖文遠

公葬洞尾山北向妣譚氏孺人葬員珠岡北向八世祖閏住公葬大叢堂妣杜氏孺人陪葬姑墓之后九世祖欽公陪葬閏住公之下妣嚴氏安人葬三頂岡東南向十世祖東塘公妣夏氏合葬大叢堂先後十代之墓統記之七世祖碑陰以垂不朽云

岿

同治十三年歲次甲戌員孫蒼角學前柑園蛇塘各房裔孫重修

各房值事

熹

職員

徽

職員

爲屏

職員

星其

州同

爲翰

職員

晋揚

耆老

鵬高

耆老

焜耀

候選知府
加二級

文錦

廩貢分發
即用訓導

周璽

俊秀

作韓

學國

作型

候選都
閩府

寬

職員

獻高

俊秀

軼才

軍功
六品

積候選中書科中書陞用府同知

星垣生員

名標武庠現任都落副總司

其照即用刑部司獄

謙武庠


名先生員


之綱生員

樹勳生員

基生員

義尙軍功六品





八世祖閨住公墓誌

夫匹夫爲善不肖聞之而色沮長老修行薄俗睹之而興思况夫君子躬行孝弟仁讓教家而子孫率乃祖行誦詩書循禮法郁郁彬彬燦然成禮讓之俗法度之家吾觀於鄉而知王道之易易也余於閨住公見之焉公系出羅族八傳世祖廼六世祖文遠公之孫七世祖惟善公之子淑配邵氏孺人生四子長欽馳贈承德郎次鏞三權四鉉孫九人綬組敕封文林郎誥贈承德郎鼎昇昱鳳譯謚諫曾孫十七人襄應章煥章舉人任龍溪縣知縣斐章邑庠敕贈修職郎雍紋承祐應科應福應祥芳遠章全章憲章言章炳章立孫廣裘珩邑廩琪邑增珽邑庠肄業南京國子監儀萬歷己亥歲貢任同安縣儒學訓導儼郡廩生馳贈輕

車都尉侃崇禎乙亥歲貢戊子副魁朝升朝用朝安錦泉萬吉預吉直
卿等孫曾濟濟科甲綿綿迄今輿論稱科名之盛簪纓之繁必曰羅族
抑且孝弟成俗仁讓成風亦必曰羅族猗乎盛已哉余嚮心儀而未目
睹也迨癸酉至丁丑屢館於羅家祠與太府灼齋翁訓導絅齋翁同知
炳南翁諸君子晨夕過從始獲睹其譜牒之所載其太祖之垂訓及諸
君子之家規彬彬秩秩郁並周文雖三尺兒童時習禮於堂下雍如也
至於膺三品之秩秉訓鐸之司受同知之職或餼食天朝名噪膠庠又
餘事耳則公之教家而享福德之慶者豈不大哉公葬於大叢堂坐丁
向癸兼午子之原是爲序

邑人生員甲子科備中姻晚晚生劉子楨頓首拜撰

祖妣趙氏熊氏西坑合墓記 充美房

且事不歷乎其難無以見心志之苦之時非值乎其變無以見運會之轉也惟歷乎其難而不覺心志之苦值乎其變而適逢運會之轉斯所謂難者不難所謂變者不變焉我分房祖妣趙熊氏正七品孺人廼明正統年間任廣西懷遠縣知縣應芳公之淑配也合葬石水西坑村後龍午向兼丙數百年來拜掃無異道光初年惜嘗乏失祭客籍賴姓謀侵西坑人以村後故拒葬構訟我族人不知也西坑人奔告青塘囑呈幫控後蒙官公斷不幫而息我房探知卽往掃墓但見祖壙樹木輸困而碑誌屹然西坑恐我砍伐又挾不幫訟之嫌遂拒我祭同治七年客亂初靖運會始轉八年闔族祖祠進火卽達知各房兄弟重陽節到西

坑掃墓該村人爭辯不休是日與任飛姪遠馨建馨兄等卽投鳴井頭局蒙各紳理勸西坑人竟然不遵九年三月集衆湊會積管置產重陽節復約各房兄弟省墓殊西坑男婦老幼摩拳持鏃逞兇拒阻此時各兄弟忿氣動目愚亦怒氣衝冠但念祖墳一日未復祖妣一刻未安忍氣吞聲無奈向空望祭而返越二日西坑黎杜彭各姓父老投城局說我冒佔圖侵等因幸文錦叔祖在局先以情理勸解之九月下旬各紳老踵楊梅局理處未妥十一月城局札傳兩造蒙劉鳳洲羅文錦各先生理勸據西坑說我等冒佔局着我衿耆當天表白若恐再葬先立字約而西坑各姓父兄始肯遵勸立約該約說西坑後山羅墓係充美各房祖墳并非冒佔此後子孫到拜永不得指阻亦不得再葬等由兩造

首肯各執一約而歸同治十年清明掃墓翦棘披榛重修古壙西坑人並無異言亦見理順心安非我羅宅恃勢而強爭之也十二年擇吉修墓工程完善十一月初八醮山之日伊村惡言震地蜂擁到山將穢物亂撥此真狂妄之至也歸而理處於城局西坑自知理虧願幫醮費而我族再擇吉旺墳焉非藉先靈呵護雲等雖不畏事之難焉能修復無恙且與運會俱轉也用誌巔末俾後人知圖復祖墓之艱後之子孫勿以道途遠涉遂缺掃墓之禮斯可也是爲記

峇

同治十年歲在辛未穀旦二十三世孫邑廩生雲煥述




西坑趙熊氏合墓山圖



右圖乃懷遠縣知縣應芳公之淑配趙氏熊氏合墓也土名西坑坐子
向午兼壬丙之原

光緒三年丁丑充美房附刊



八世祖善吾公暨夏氏墓誌

羅善吾公者

諱

懿公第八世孫廼高明充美鄉之鼻祖也

予

秉鐸茲土

歷有年矣己酉之歲重修其墓公之裔孫邑庠龍光監生學孔郡庠逢
欽等請誌于予予曰公之生前予不得而知然欲驗其前必徵其後公
前明天順人也始居羅屋園配太平都塘安鄉夏氏天順年間卜居充
美一人崛起千枝繁衍鳳凰卜吉于前螽斯繼慶于後詩書濟美代有
文人禮讓傳家世遵祖訓非所謂枝盛者根深流長者源遠耶以是知
公之生前誠厚德之君子氏之內助必淑德之名姝也爰爲之銘曰


惟地之靈

惟神所憑

子孫其吉

如日之升

道光乙酉舉人特授高明縣儒學訓導宗姪廷桂拜撰




十世祖東塘公暨夏氏合葬墓表

羅東塘公歿葬於其里大叢堂之原配夏氏孺人葬其左焉地道尙右
其子煥章起復抵京師見吳子泣拜曰予先人墓有誌銘矣而未有表
也吳子按之嘆曰賢哉夫表者揚也表其賢以率後亦以風乎世也公
之先邢氏避漢勾黨禍穩於羅山因羅爲姓焉後多仕宦其顯者如唐
永淳志貞者夫志貞從肅宗於靈武拜晉陽節度使後周賓爲德州判
官宋有大器爲江都訓導贄爲籃山知縣自羅山數遷於員岡員岡之
始宋淳祐朝端爲德慶府同知九葉至欽配嚴氏生公公性樸直不事
機智節儉自持好揚人善兄早喪遺姪孤待之如子姪又早喪嫂氏乖
張鬻兄田改適公處之以積誠吾其表之哉嚴待子姪寬處鄉鄰凡貿

易不比秤不揀錢地方有自然之利者悉興之鄉人有被誣者力解之
其大者如開黃絲之水溝而田不苦旱建沙塘之基霸而田不病洿復
建護龍廟以增一鄉之形勝其功德如此吾其表之哉事舉子業不就
而至老手不釋卷通經書諳大義百家子史尤熟作詩清雅醫卜之書
無不精通其藝達如此吾其表之哉生平幹理戶役秋毫不犯縣主請
爲鄉飲正賓厥配孺人生而淑惠歸而善事舅姑姑享年九十三孺人
生勤儉至饒裕訓子孫而諄諄於謙和孝順之道公性頗躁急而承之
以順至白首雍雍如也其齊德如此吾其表之而實慶之而貽
遠紹述者得儀式之典故曰表者揚也表其賢以率後亦表於東塘公
之墓厥後其興乎斯世其勸乎

大明隆慶六年歲次壬申仲春之吉

賜進士第翰林院四夷館提督太常寺少卿前吏部文選司郎中吳承
綬拜撰



九世祖妣嚴氏三頂岡山稅

乾隆三十七年准懇山稅給照

廣東等處承宣布政使司爲請定報懇給照事案據肇慶府詳據高明縣業戶羅東塘承懇土名三頂岡荒地壹坵南至李旺田北至岡壹百貳十步東至嶺窩西至嶺路各肆步稅貳畝正應於甲午年起徵給印照等由到司據此合行給發爲此照給業戶羅東塘收執卽便遵照依限輸糧毋違



大叢堂原父母墓立石記

十世

昔者孔子合葬其親於防曰不可以弗識於是封之崇四尺孔子之言曰吾從若斧者焉馬鬣封之謂也夫上古不封孔子封之歟先府君羅公於嘉靖三十七年戊午三月初一日辰時葬於大叢堂至嘉靖四十四年壬戌十二月二十三日巳時先母夏氏與之合焉昔疲於奔走而封之未完固也迨今廼鳩土石工整之蓋古之封者土石與土類也要亦豈外乎孔子馬鬣之封哉而墓必有祭祭貴有田置稅田四畝六分供祖父母祭并祭及伯父與堂兄之祭是尙親也登科食祿忍薄之哉乃自買本村田拾九畝一分以益之於是合原祀田三分共田壹拾九畝四分體府君之意立久遠之規祭品素見於家訓三房子孫遞年輪

高田縣志上 加言
卷之二
收田利照數虔供母氏田畝與原同弟姪買墓地共二拾六畝各稅三房均收供祭三房子子孫孫勿替引之可也府君組乃欽公之次子成化丙申九月二拾二日酉時生嘉靖三拾四年乙卯正月十二日辰時卒公配滿榮公之女成化十八年壬寅五月十三日戌時生嘉靖乙未年十二月十七日辰時卒壽七十八歲男三長應章先卒配李氏次煥章爲荆府審理正娶葉氏次斐章庠生娶杜氏女二長適區文科孫八孫女八外孫三等立石

工興于隆慶六年壬申立春穀旦暨完

煥章記

萬歷六年五月三十日寶鴨山墓碑文

修先祖考瑩記 十世

祖考 諱 禎 字 國興 號 桂州以先大夫 諱 黃裳官封大理寺評事贈寺正

累贈廣西平樂府知府

祖妣譚氏累贈恭人隆慶二年戊辰七月二十一日先大夫奉

祖考妣合葬于星子岡今名寶鴨山坐辛向乙之原時

祖考妣初承

恩典以故循制修瑩表墓尙有待焉無何先大夫就徵起復敷歷中外

迨庚辰歲先大夫以監軍貴州致政

祖考妣凡三受

誥命瑩事得盡制而循矣廼先大夫有大宗祠之建未暇及癸未歲祠
方告成而先大夫遽仙遊則所以修之者不在今日乎因簽協吉鳩工
度傭纍而登之覆以石象屋巒順山勢上下焉

祖妣生於弘治二年己酉四月十八日戌時卒于嘉靖三十三年癸丑

四月二十三日申時壽六十有五子男三長諱黃衣邑庠生次卽先大

夫諱黃裳己未進士貴州按察司副使三諱黃卷處士孫男五建婁邑

庠生建箕國學生諱裳之子建璧建奎建斗諱卷之子曾孫男八公祚

公孟公望公蓋公益公璽公祐振振未艾工始于戊子年九月二拾一
日辛未成于拾二月拾八日丙申吉旦

孝孫男建婁百拜謹撰

十世祖禎公暨譚氏合墓表文

東粵高明封君 羅公余同年憲副居黃裳父也卜葬星子岡厥配譚

氏恭人合焉孫太學生建箕以兄庠生建婁書諧余請表墓余按狀則

嘆公以潛德獲報於天而竟厥志於賢嗣者歟公先世自南雄珠璣里

遷員岡族多士而諱禧者舉進士爲諫議大夫則其著也元至正間諱

受達者始遷范洲祖父曾大父諱庚大父諱甫父諱經率崇讓敦行誼

也稱羅氏名族至公凡七世生而穎異能爲舉子業值母劉氏蚤逝繼

母關氏歸未幾父亦逝公與恭人哀毀骨立奉繼母如母撫孤至愛身

先勤儉致殷以獨任家政難卒業豔慕古高士風念切施濟範俗日勉

弟子成己志課之以所習業嘗至夜分不寐 恭人亦紡績伴之以故

憲副君日習庭訓爲諸生十年薦于有司又十年遂登第每貽書宦中
諄諄皆官箴語談當世務若業所擘畫且曰若究竟厥施以無負
天子吾志畢矣區區升斗非所望也 憲副君邦命敷歷中外籍籍有
聲 公實成之初憲副君令雲夢以治行高幸被

召內廷也譚氏歸公貽謀動色相賀公第曰吾不喜吾兒轉官喜八大
理得平反活人也視之若固有焉平居醇謹嚴介衣冠言動恂恂儒生
即膺


誥命披章服人亦莫知其爲封君以故所至稱之曰長者端人正士每
以得被容接爲幸無幾萬石君之風里中無論疎戚有爭訟者輒就平
之或亦望廬返者平生貲財未嘗介意哉田園被侵亦置不校一日往

田間拾遺金數十詰且於故處俟其主還之竟不受謝歲收家用外周
及貧窶于嘉靖間山寇蜂起公逆之爲里中患獨捐田出金倡衆剋水
寨寇至族保無虞且活鄉鄰之奔託者數百命南岸堤界高要兩邑環
田數百頃衆推公總堤防市田疏渠建竇消潦潮汐通焉迄今利之其
潛修卓行類若此他如留空地待建宗祠憫外族而定嗣營葬觀虛墓
而歲時存獲殆縷縷未易悉數于呼人之積善及人者福必集厥躬貽
後裔公承先德好修于潛人被之矣而且大行其志于有子則天爲斯
人報公直以予貴乎哉今令孫建婁等以文學顯諸曾孫少年俱勃勃
英氣余知世德作求餘慶未艾將必有後先後濟美而推所自於公者
因表而出之以爲潛德者勸

萬曆十六年歲次戊子九月念一日辛未吉日

賜進士第資政大夫工部尙書東明年晚生石星拜撰

賜進士第通議大夫戶部右侍郎永昌年晚生胡執禮書丹



十一世祖高峯公墓誌

自古修德積行之君子生則榮也歿亦揚光上則輝諸青史次或誣於

郡邑誌於家乘誌於墓皆其實有不可掩者而芳名遂流於奕禩若高

峯羅老先生非所稱令德君子樹典型以爲世法者歟公系出豫章名

族即先哲仲素先生之後諱美公之裔孫也其先代有諱禧者舉進士

爲諫議大夫有諱藝者興王通上策不用退居高尙有諱志禎者拜晉

陽節度使歷數前代罄碑難書而近稽充美之祖則善吾公其始也善

吾生戊號嵐山嵐山生卯住號會奎會奎生公公初幼孤苦賴妣撫成

生平事親孝持己恭接物和御下寬配唐安夏氏安人生子有六長諱

葆叙號仁賢矢志大業次諱二叙號仁明德行風聞四諱懂叙號仁博

高州光華商店承刊
廣州光華商店承刊
二十九
墓誌
卷十六

循謹有禮六諱六叙號仁慈疊序有聲此數房者螽斯振振文人濟濟

為家之瑞為國之光孰非公盛德昌後所致哉三諱華叙五諱五叙未

及詳攷茲值丙申孟夏之吉公仍孫等思念祖德重新修壙授管於余

余不敏其何能文第余與公六世孫之秀有姻婭年好觀公譜牒知公

懿眾世系畧悉爰擲管以誌其概勒石以垂不朽抑亦秉彝是好耳若

夫顯揚祖德上聞

聖天子崇祀郡邑俾史臣之紀載則又於公之後昆重有望焉


銘曰

松岡吉穴 象肖蝦公 青龍枕後 面向三峯

月山拱照 窩水汪溶 復修斯墓 福祿重重

康熙庚午科欽賜舉人年家姻眷晚生杜演頓首拜撰





修先大夫恭人瑩記

先大夫考羅公

諱

黃裳

字美至

號

小灣登嘉靖己未進士歷官貴州按

察司副使妣區氏屢贈恭人先府君六年卒萬曆庚辰正月十二日葬

於展旗嶺坐乙向辛之原癸未十二月二十五日奉先大夫府君合焉

顧表墓非石筆曷以彰美適弟建箕就北雍慨然頓首具狀請表于忠

銘王公茲歲在萬曆十六年戊子九月廿一日遵制題墓登瑩基而城

之覆以石臺因隴高卑爲台爲級四隅六石獸前豎石方碑亭奉 誥

勒表文鐫珉用垂不朽訖于十二月十八日事竣先大夫恭人之行實


彰矣然必有祭田以廣孝學田以裕後遂謀之弟箕將先大夫祿餘所


置高熟田二百畝鋪七間入作蒸嘗一坐落墓前坑跟東里桑根等處

田一百畝永供考妣墓祀祠祭一坐落本園基根東里塘基脚等處又
田百畝并店舖七間永供子孫進學讀書體先大夫之意立世守之規
祭田歲計所入婁箕子孫兩房輪收虔供祭品其贍學田及舖租所入
惟子孫進庠序始與之出身則弗與也若藉此而登科及第者增之蓋
先大夫作于前以昌我後婁箕等愧未能不承家學以光其業然子孫
能繩祖武述于後則後先繼美余屬望于子孫之賢哉先大夫生于嘉
靖元年壬午十一月十六日卯時卒于萬歷十一年癸未八月初五日
申時壽六十有二恭人生嘉靖五年丙戌七月十七日辰時卒於萬歷
五年丁丑八月廿五日辰時壽五十有二男二長建婁邑庠生次建箕
國子生女三長適番禺庠生黃在衿次適從化庠生黎邦璘三適三水

庠生蘇兆亨孫男四公祚公孟公裕公祐奕葉相承聊以所覩記焉

孝男建婁稽顙泣血謹記





十一世虛川公暨葉氏墓誌

士有卓犖踈節遠鶩之材數不能無骭骸負俗之累故有世所○爲山
斗景若○○○其人○○○○而不見其人卽見其人而不見其用力
少○其○而不殫其能以至憤悶爲世尤怨悲傷自廢故賈太傅隕窾
於明時介之推蹈焰於霸國○○○○○○諸葛謝容披猖於江表名
賢早世亦非造物之○也惟夫遐福淵弘之君子退若訥虛若谷渙乎
若冰釋與世卷舒而冲乎自得故能觀顯○○○○○○與世同樂而
與喬松比生然求之天下概鮮其人矣而吾邑羅虛川先生有焉先生
與先大夫交最善不肖自忝賢書修業於鄉者幾廿年得先生之教訓
最多旣而不肖成進士讀中秘書乙未之歲啣

命過里時先生年已八十餘猶強病扶掖進不肖於庭首詢以

主上之聖明次勉以大業之不易蓋別無幾而先生且棄世嗣君珙等

乃以銘誌請夫以先生之○○○○無如不肖卽○○○○於先

生與伯○○者亦無如不肖事言之記職將誰諉無若及瓜報

命遂爲諾責浮沉於南北冷曹若又十五年茲幸返里閭以老且病燕

於文詞度○○先生○○可使有久要之媿○○也爲之援肇

書先生諱煥章字美充邑之員岡鄉人其先邢氏避漢黨錮之禍隱於

羅山遂姓焉歷晉唐有門至周世宗○○○○○○○○○○○○○○

○○○○○○○○自南雄珠璣里避亂於廣州明年自

廣州遷於邑之孔塘又分居於員岡員岡之始○○○○○○○○聞以

明○○○○同○○○○則先生父也娶夏氏翁

樂道衝泌不求聞譽德○○○○鍾美苦予先生少而○○○○

○○○○所不討論

爲文自成一家言而於事之○○○尤○○○法人皆稱虛川先生云○

○○○○

之子弟有方疏督學廣廩餼○○外艱○○○姚之學鄒東廓講而

明之先生門○○○○

○○○○以內艱補袁之宜春甫至○○○聘○○○士後爲名臣者

若而人未幾遷○○○○

○○○○竄匿先生清虛糧却饋遺○○○慝○○○○

旬月之間

同

天下有

爲已任所職糧例悉就釐正

清無名之費

良勸乃循資轉臬幕未幾復

轉

藩而拂不歸矣先生

祠修祖墓立祭田鄉之

生者授田以耕死者

賻費以葬俾無失所

及其外俗及女弟之

下人又修復社學倡衆助建東塔以倍形勝而文

運聿興建石橋十餘度便行旅而沙圍鄉堤修築之計作

之暇日爲古文詞與先大

夫及鄉老三四公爲文酒會入則課子若孫以濟義於○傳之學○

積齋

王公含字張公皆生山陰廣文時門人○王文轉自郡太守居端溪者

八九年先生於公事之暇並無私謁○人未幾遷○

○不足稱君子若先生者可無愧君子

矣先生以○世之譖旗時之望居官○有○

拙於逢世位終幕佐未六旬而歸老人莫不爲扼腕而先生終身怡然

○乃不以芥胸○次徜徉自適以樂遐齡○

○其遇而豐其德並豐其年抑仁者之壽固自熙養得乎配

宜人葉氏同邑幕田漁樂翁之次女勤儉以立教訓孝敬以奉翁姑先

生生於正德生○○○○○○○○居官居鄉得不問家人產皆宜
人賢助也先甲戌年六月十六日卒於萬歷乙未年九月廿八日享壽
八十有二宜人生於正德庚辰年十一月十九日卒於萬歷丙申年十
一月十六日享壽七十又七男三長珩邑廩生娶雲良里葉氏次琪邑
庠生娶唐際里何氏次珽邑廩生前例授國學娶羅格里楊氏女三長
適桂村里馮存仁次適山頂鄉貢士楊銓之子汝默次適山頂鄉石首
三尹楊希奭之子國學生汝儒孫男三人長復賢娶桂村里馮氏珽出
次擇賢聘唐美里劉氏次探賢珽出孫女九人珩出者幾長適邑城承
差張喬梓珽出者幾長適南海九江南安里天啓之子次適府城桃溪
里庠生何鍾奇珽出者幾長適先兄大標第四子鹽城所襲百戶志績

次適唐際里承差何子明次適高要古榔里己卯科舉人李兆棟○孫
 男拾人長公鼎聘○○復賢出曾孫女○人以茲在萬歷己酉四月廿
 二日○○奉先生暨宜人葉氏合葬於土名天湖坐丁向癸之原銘曰
 玉蘊山輝珠懷川媚德敷壽寧而毓靈瑞卓矣先生爲邦之懿覃精經
 術將以經世道○徇○德○位○稍歷州縣○○○○○○○○○○○○○○○○○○○○
 ○○○○脫然無累○○○○○○○○終伉儷沒而令名於心何愧仁者之
 壽已司其契厥後蕃昌○○○○○○○○○○○○○○○○○○○○


峕

萬歷四拾五年歲次丁巳拾一月拾一日

賜進士第太僕寺寺丞前左春坊左中允兼翰林院侍讀學士愚世姪

區大相頓首拜撰

右碑誌頗多殘闕茲僅就可見者摹之其不可見者仍照字數多少空
之而已



十一世祖南涯公偕配麥氏墓誌銘

賜進士出身中憲大夫整飭永平等處兵備道湖南按察使司按察使
前欽差提督工部學校欽命兵部侍郎兼都察院左副都御史陳萬言
撰

公諱灝號淳之字南涯屏山羅氏之烈祖也公性愿而正和而平溫厚

純篤惟以拓業貽謀爲樂事娶麥氏淑慎性成徽音譽美生子五人曰
金曰睿曰碧曰冕曰經恪守父業丕振家聲迄今亂祚之繁人以爲厚
德所致也公生洪武戊寅九月終成化壬寅十月初五日壽八十五歲
氏生洪武戊寅終成化己丑十二月三十日壽七十二歲合葬于鶴山
盤田龜岡甲向之原今子孫重修墓道以素未誌銘余匍伏而銘之曰

仙兆龜岡

金玉韜光

完眞葆素

賢哲行藏

雲仍世胄


奕葉傳芳

報功報德

彌遠彌昌

萬歷拾六年歲次戊子季冬吉日

衆裔孫等立



十一世祖平川公墓誌

公諱斐章字浚充號平川邑庠生敕贈修職郎同安縣訓導實敕封文
林郎誥封承德郎東塘公之子嘉靖己酉舉人歷任壽寧宜春山陰各
縣教諭任龍溪縣知縣陞荆府審理正煥章公之弟也公品學兼優歲
試進庠翹然居首仲兄煥章亦高列優等爲多士冠簪花日宗師特加
獎勵已有雙丁之目及回省札召公昆玉同入署肄業備致優渥公老
年苦心教育爾時士類咸賴裁成公復廣積善行如邑中修橋建塔建
廟諸大端皆經手辦理卓有成績望氣者早知公之發祥固有未艾也
公生於正德 年正月初四日終於萬歷 年九月十五日葬於對村
大坑岡鳳凰山壁上掛燈形坐丁向癸兼午子原配杜氏生三子長曰

儀以歲貢任同安縣儒學訓導次日儼郡廩生次日侃萬歷副榜崇禎
歲貢孫十人廩增附者五歲貢者一職員者一曾孫二拾人廩增附者
九官至遊擊者一職員者一簪纓之盛聚於一家迄今閱二百餘年功
名雀起綿綿勿絕則見膺三品授同知授州判或振高州之鐸或任副
總之司或補刑部司獄或用按察知事實繁有徒其食餼天朝名噪膠
庠者更不勝枚舉善積慶流理固然也素慕公德謹按公之家乘樂爲
之序而系以銘

銘

鳳岡峨峨

鍾英毓秀

曰

窀窆長安

克昌厥後

同治癸酉科舉人揀選知縣後學楊寶琛頓首拜撰

十一世祖平川公配杜氏墓誌

太孺人杜氏明庠士贈修職郎平川羅公之配也予從其後人遊得其家乘讀之宛若目前事喟然曰予乃知太孺人之德與羅氏之所以興也其供內職無赫赫名予知其爲婦之代終也其恩勤見端予知其爲母之能裕後也方太孺人始歸時平川公甫遊庠力學不治生產太孺人躬耕給所需及平川公隨伯兄虛川宰龍溪一切奉祀事課兒孫暨內外大小諸務攝自太孺人罔不井井其勤且勞若茲承夫志也則其他之贊其成不尸其功而無績可紀者又可勝道耶予故知太孺人之能代終也平川公世家故微自太孺人經理數拾年寢以滋大始有徙居之意適虛川公回籌由員岡遷城內太孺人因以從遷謀于平川公

遂相地卜築于蒼玉碧玉間羅氏之聚族自此始彼其皇皇于經理也
非不慣食貧也爲子孫食有福焉爾其汲汲于卜築也非不憚重遷也
爲子孫重開基焉爾予故知太孺人之能裕後也夫內職不必奇貴于
貞恩勤不必多期于大爲婦之代終如此其穀貽者厚矣爲母之裕後
如此其利賴者長矣興羅氏者其在斯乎太孺人葬青塘側向墓而未
誌今議重修請誌于余余曰嗚呼太孺人距今二百餘年矣過其墓者
思其德猶想見其爲人而况于余也哉而况于其子孫也哉宜乎思述
而誌之以垂不朽也至其生卒子姓另碑具誌不贅謹述其發祥之本
揭于阡俾保世亢宗者不忘所自銘曰

瓜瓞綿綿


天開吉遷

德裕後昆

於斯萬年

辛酉科鄉進士丁丑大挑二等卽用儒學乃截選知縣謝鳴臬頓首拜
撰

嘉慶二十三年歲次戊寅季春立



計將祖墓山稅開列

康熙二十三年清丈潛字一十九號二十號係羅姓祖墓稅地南至路
北至羅宅田西至杜宅田東至后枕岡土名荔枝脚稅二畝九分八釐
正又咸豐六年丙辰八月初九日與大楠村杜唐卿買受潛字二十二
號土名倉頭稅一畝一分正此田鱗册土名倉頭今鄉人喚荔枝脚係
在平川祖妣山面前正拜臺脚均在羅平川的名納糧

十二世祖太兩公墓誌

公諱儀

字子孕

號

太兩廼邑庠地贈修職郎

號

平川公之長子也生平

醇直孝友苦志力學衣履不華言動不飾年十三自負岡隨父入城中

卜居蒼玉坊後又隨嫡伯虛川任龍溪縣尹任所讀書手不釋卷早歲

遊泮卽補廩應萬曆三十七年歲貢授福建同安縣訓導居官廉正接

物和平培養士類邑人重之踰年卒于官扶櫬歸里闔邑紳士同謚曰

端樸先生原配大唐美劉氏生三子曰守訓充邑庠曰守憲宿儒曰守

敏邑庠續娶高要九塾村區氏生三子曰守先充武生曰守貞力農曰

守昌恩貢生考授縣丞孫振德振采俱充郡庠出嗣曾孫文燦應康熙

四拾七年歲貢生公生于嘉靖戊申年拾二月初三終于天啟丁卯年

二月拾三日丑時於崇禎己巳年仲冬卜葬於北門外土名佛坑坪山形錦被蓋孩兒本山坐壬向丙之原

銘曰


福以德基 山川誌美 靈之所鍾 龍盤虎踞

吉卜牛眠 祥開麟趾 子子孫孫 俾昌俾熾

道光乙酉科舉人揀撰知縣特授高明縣儒學宗末廷桂頓首拜撰

道光二十二年歲次辛丑季冬穀旦值事唐朝亮榮 健中遠榮 重修勒石

光緒元年歲次乙亥季秋吉日學前柑園蛇塘各房重修




計將山稅開列

康熙四十六年六月清丈歲字號土名深坑懇稅二畝零八厘在羅太

兩花戶納糧

按本族前代硃卷載公壽八十歲是公生於嘉靖戊申必終於天啓丁卯惟原碑載公生於嘉靖戊申終於萬歷丙辰又於天啓己未卜葬約原碑近是查花甲圖天啓無己未謹誌之以待後考



十二世太兩公墓文

嘗聞太上有立德其次有立功謂之不朽所以子產云亡尼父泣其遺
愛趙武既沒趙文懷其餘風于文簡公見之矣今於羅太兩公有慕焉

公諱儀

字

予孕

號

太兩廼明邑學前坊人也公之先有禧者唐永惇間

舉進士任諫議大夫正氣自凜見惡三思以德行著後周賓爲德州判
官宋有大器爲江都教諭從休與胞兄從彥理學名世而公之德行克
紹前徽稟川嶽之靈暉含珪璋而挺曜和順內凝英華外發少而孝友
長而醇篤行顧其言心純於學善詩啟工詞賦爲韓熊兩邑候器重弱
冠採芹卽食廩餼東西兩學屢舉優行宗師巡試問邑人諸生品學孰
優皆曰羅儀宗師曰明邑人公道公之德行遠邇同聲公少隨嫡伯虛

川任龍溪縣尹署內讀書手不釋卷仁經義緯既欲匡濟朝廷玉振金聲尤冀燎亮區夏虛川每見上司回署皆曰儀爾勿爲舉人官舉人官受氣其器重若此公之才德素抱可知也公之先有志貞者唐肅宗時拜爲晉陽節度使功勳赫濯後德弘爲徐聞令贄爲藍山縣知縣朝端爲德慶府同知此皆績偉當時澤渥後世而公之功烈克紹前徽應萬歷己酉歲貢任福建同安訓導重廉恥崇禮義以振興學校爲己任以敦篤孝弟爲本根課士不計修脯誨人不辭勞瘁春風遍物化兩宜人一時紳士尊敬稱曰端樸先生其功業卓越後卒于署諸生心喪哀哭失聲此時官囊空虛門人作扶義錄五本助以百金鄉紳厚祭賻之扶櫬遠送于數里之外其功德之積累深入可知也予忝屬宗親與公之

裔孫灼齋翁素好囑墓誌于予予稽其邑誌考其家乘而知公之立德
立功眞爲萬古不朽者宜其子之守昌恩貢考授縣丞曾孫文燦歲貢
而序選儒學世世子孫簪纓不斷固彼蒼眷顧之隆亦爲世之修德建
功者勸也

峕

光緒元年歲次乙亥仲春穀旦

庚戌進士刑部主政羊城掌教宗姪家勤拜撰


癸酉科舉人卽用知縣宗姪孫惇高敬書



十二世太兩公原配劉氏墓誌

孺人劉氏乃特授同安縣儒學太兩公原配也娶大塘尾鄉生於嘉靖
戊申年三月十九日辰時終於萬歷丁丑年五月初八日吉時享年三
十歲葬古斗崗山形仙人昂睡坐西向卯兼庚甲之原生三子曰守訓
邑庠曰守憲邑廩生曰守敏儒士公葬於佛坑坪山形錦被蓋孩兒續
配區氏葬對村鄉山形鳳凰崗在平川祖墓右邊生三子曰守先儒士
曰守貞邑庠曰守昌恩貢生今學前柑園蛇塘各房子孫勒石以垂不
朽

嘉慶七年歲在壬申季秋穀旦立



十二世祖太兩公續配區氏墓誌

孺人區氏廼高明縣城內學前坊特授福建同安學訓導羅太兩公之續配也賦性慈和持家勤儉公前配劉氏生三子長曰守訓邑庠次曰

守憲

宿儒

三曰守敏

邑庠

三十歲而卒諸子皆幼區氏于歸細心提携

視猶已出恩勤鞠育以致長成則老孺人慈愛克敦也公自少勤學不涉塵囂補廩後宗師屢舉優行爲韓熊兩邑侯所器重自是益潛心於學而家中諸務有條有理則老孺人宜家有自也及公隨嫡伯虛川公任四川龍溪縣尹而堂上有老姑皆克先意承順婦道盡而子職無虧則老孺人孝養不衰也厥後公屢戰棘闈艱於所遇以歲貢任同安縣訓導品重圭璋望隆山斗學校之振興實有賴焉闔邑搢紳咸知矜式

號之曰端樸先生則老孺人內助足徵也夫閔氏後母不免一子之寒

羅氏後妻能為三子之育老孺人加人一等矣至其處家室以和相夫

子以順則所謂婦道無成而代有終也宜其子孫衆多而家運蒸蒸日

上矣生三子曰守先武庠曰守貞力農曰守昌恩貢廷試考授縣丞孺人生於嘉

靖乙卯正月十二日吉時終於崇禎癸酉三月十四日享壽七十有九

卜葬於鳳凰山翁墓右邊山形壁上掛燈格癸向兼子之原

丁丑科進士朝考 欽點江西知縣世姪麥錫良拜撰

光緒 年 月 日 學前 蛇塘 柑園 鯉岡 房重修

太祖美公山在孔堂村后進朝馬形原日坐巽向乾兼己亥分針新歷

坐翌宿柴度向室宿柴度極佳

太祖舊祠在孔堂村坐乙向辛兼辰戌分針新歷坐角宿陸度向奎宿

七度宜改坐角宿柒度向奎宿捌度

六世祖文遠公原配譚氏墓在圓珠岡坐巳向亥兼丙壬分針新歷坐巳張宿十度向亥危宿十二度

八世祖閏住公九世祖欽公墓在大叢堂宜改新歷分針張宿十八度向則要危宿二十度正合巳亥兼巽乾

九世祖欽公原配嚴氏宜用新歷坐戌向辰兼辛乙坐璧宿十一度向軫宿十度更催貴

十世東塘公暨妣夏氏合墓在大叢堂原日坐申向寅兼庚甲分針新歷坐畢宿八度向心宿七度極佳

十一世虛川祖暨葉氏合墓在天湖卮原日坐丁宮鬼宿二度向癸宮
牛宿三度以理氣言之宜分針新歷改用坐午宮柳宿一度向子
宮牛宿七度又要待下元甲子旺氣至之時乃可動作落低山圈
更佳予若如此待後賢採而用之

十一世平川太婆杜氏原日坐乙向辛兼卯酉坐亢宿二度向婁宿三
度極佳若依分針新歷改坐角宿十一度向婁宿一度發貴更鉅
十七世覺世公墓在禾倉金鼠形原日坐向坤艮未丑若依新歷分針
改坐坤參宿七度向艮尾宿十五度兼甲寅杜氏墓照原日坤艮
未丑坐井宿三度向箕宿七度馬氏墓在新墟三百桂原日丑未
癸丁今用新歷分針坐癸斗宿十七度向丁井宿二十三度兼丑

未

十七世長世公墓新歷分針坐甲向庚兼寅辛畢宿一度房宿五度

十九世爲松婆葉氏墓在龕羅原向午子丁癸改新歷分針坐丁向癸

兼未丑坐丁井宿二十三度向癸斗宿十七度安封誥碑在坤位

后土在巽位

十九世壽軒公暨劉氏合墓在新墟峽山涌依新歷分針用坐癸向丁


兼子午坐牛宿一度向丁鬼宿一度

二十世敬亭公墓在鹿洞東佛凹嶺西飛旛盤帶形用新歷分針坐壬

向丙兼巳亥坐危宿陸度向張宿四度配譚氏墓遷在岡根寺山

坐癸向丁兼子午牛宿二度井宿三十度

光緒二年秋新會墾底鄉宗末耀庭訂拜



十二祖世玄菴公暨謝氏合墓碑記

公諱儼號玄菴乃德慶府同知諱朝端公之十二世孫敕贈修職郎同

安學訓導諱斐章公之次子也公邑廩近貢世居蒼角坊生平好學不

倦壯隨家伯煥章公任龍溪知縣佐理宣猶德化宜民晚年兼通地理

近代諸名墓悉由自擇原命生於嘉靖甲寅十一月十一日終於崇禎

戊辰五月初三日享壽七十五歲配謝氏太孺人教順慈和生於嘉靖

己卯十月初十日終於崇禎戊寅六月廿八日合葬大墓仙人大座形

俗云牛賺土名黃田山稅肆畝丁向兼未生三子長曰守平省祭冠帶次曰

守奎邑庠三曰守中邑廩夫積之厚者流愈光根之深者葉自茂觀于

玄菴公之積德洪厚宜其孫曾之雀躍長發其祥也公之孫興元邑庠

高月羅氏侯普 卷十六 墓誌 四十九 廣州光華商店承刊

士元武庠 士翹武庠 士升武庠 士遴俱邑庠 知方武庠授陽江營防守遊擊 曾孫名彪監生 文耀武庠

烈武庠 玄孫宗周武庠 布武庠 紹曾邑庠 拾七世孫攀孔監生 環國學

向高武庠 兼山邑庠 拾八世孫光字光宗兄弟同案進庠 見龍覃恩敕封修職郎 拾九世孫

雲丁巳歲貢任河源學訓導 壽國學 璋從九品 瓚俱國學 一拾世孫為龍甲寅歲貢即選儒學 為驥

候選直隸分州 定南郡庠地贈修職郎 為翰為屏職員 孫曾林立人文蔚起何莫非其祖之

積德洪厚有以貽之也哉爰為之記


同治十三年壬申特授高明縣教諭黃煜然拜撰


乾隆三十七年准懇山稅給照

廣東等處承宣布政使司為請定報懇給照事案據肇慶府詳據高明

縣業戶羅公業承懇土名黃田岡荒地壹坵南至羅居田北至岡貳百

四十步東至牛臀西至牛腰各四步載稅肆畝正應于甲午年起徵給
印照等由到司據此合行給發爲此照給業戶羅公業收執卽便遵照
依限輸糧毋違





十二世祖念湖公墓誌

公諱瀾章字念湖號盛充乃德慶府同知 朝端公之十一世孫也公

之父諱石泉祖諱柱世居員岡東坊而公往石九契親處就耕卽卜居於石九上鎮焉越年回員賣田塘地宅而返遇賊被害置諸岡背之陽越日蟻負土覆過其半遂卜厝於此至今猶嘖嘖相傳後形家名爲眞武踏龜蛇坐己向亥兼丙壬配熊氏葬嶺頭村前明蝦出洞坐西向東其生終年號湮沒無傳矣溯公生平鑿井耕田自食其力淑配則孝順慈祥積德蔭後生二子長德成次景成德成之子長文韜居石九次文禮遷井頭景成之子長開基遷際村次文耀遷嶺頭繼繩繩發祥正未有艾也第自兵燹以來祖墳屢被侵葬面目頓失良可慨矣夫事不

彌其闕則抱憾良多茲當清明掃墓族屬謀修墓於予予卽流連不置
低徊久之僉曰近來宗支蕃衍營積有餘不趁時整頓重修祖靈奚安
乎於是僱工買料卜吉興修各房尊長囑予記之予特喜誌其巔末而
泐諸碑以垂不朽

銘曰

龜蛇脚踏 眞武堂皇 英靈常在 應地無疆

牛眠卜吉 瓜瓞綿長 孫孫子子 俾熾而昌

光緒二拾年乙未歲弟子員裔孫湘瀾拜撰

光緒三十年歲次甲辰 月 日

石九 際村 裔孫等重修泐石
井頭 雲益

十三世祖守昌公墓記

公諱守昌

字

化藝後改燕及

號

拜月乃同安縣訓導太兩公之第六子


也篤志力學端樸自持弱冠充邑庠補廩屢戰棘闈而艱于遇應康熙元年恩貢癸卯廷試考授縣丞回籍候選後以年老無志于仕生平行誼亦無大過于人惟內而整齊宗族則惟孝惟慈外而總理園務及學中修建重典則矢公矢慎此其彰彰也公生于萬歷戊戌年四月初四日辰時終于康熙甲子年十二月初八日丑時壽八十七歲配譚氏葬西逕五馬歸槽山北向生子天麟側室順德縣譚氏葬對村后鳳凰山生三男天孟天觀天書乾隆二十一年將公遷葬品村獅子岡至道光元年復遷歸城北土名錦被蓋孩兒坐壬向丙之原以陪乃祖以篤斯

一曰...
嘉慶丁巳歲貢特授修職郎惠州府河源縣訓導兼理教諭事加三級
族孫雲頓首拜述

嘉慶丁巳歲貢特授修職郎惠州府河源縣訓導兼理教諭事加三級

族孫雲頓首拜述

道光元年歲次辛巳季冬穀旦重修



十三世聚五祖墓記銘妣劉氏孺人合墓

公諱守奎字文璧號聚五邑庠生廼邑庠生號平川公之孫邑廩生號

玄菴公之次子也生平喜讀書賦性醇良秉質仁厚有君子風祖妣劉

氏溫和淑慎勤儉持家夫妻相敬如賓日以積德為事公生于萬曆辛

巳年九月念六日寅時終于順治丁亥年十二月念一日巳時享壽六

十一歲妣生于萬曆癸未年十一月初八日酉時終于順治己亥年四

月念三日丑時享壽七十七歲生子二長諱士升邑庠次諱遴升邑庠

孫五人諱名彪國學諱文耀武庠諱烈武庠曾孫十人諱宗周武庠諱

布武庠玄孫十五人諱向高武庠諱環國學仍孫諱光宇諱光宗兄弟

同案進庠至今孫枝繁衍書香益盛知公之垂裕無窮也公與妣合葬

于橫岡村右蟠龍坐丙向壬兼午子之原茲因重修用勒諸石以垂不朽


銘曰

龍蟠虎伏 穴結金中 後枕屏帳 前列筆峯

福垂遠裔 貴出名公 簪纓世胄 長發無窮

丁巳科歲薦卽用儒學訓導裔孫雲記

嘉慶二十三年歲次戊寅仲夏吉日



十四世敬臺公墓誌銘

公諱

一湛

字若清

號

敬臺郡庠生乃仁慈公之孫翠山公之次子也公

早歲能文蜚聲巽序采芹後業益專恻然有遠舉之志都人士咸推爲
重器乃僅以郡庠終固公之遭時不偶抑亦天之故屈其遇俾其子孫
久而彌昌也自公之後累世書香咸遊泮水從此奕葉簪纓丕振家聲
又豈有窮耶源忝屬宗房壯年教讀盛鄉得與公裔孫庠士龍光逢欽
密相往來論述之餘備陳祖德故能得其詳而樂爲之序公原命生於
嘉靖乙巳十一月初七日未時卒於萬歷甲午 月念五日吉時享年

五十歲迨萬歷三十七年奉葬於波泔鹿岡逕牛頭嶺坐丑向未兼艮
坤之原于康熙四十六年裔孫奏凱帥又懇楊梅一都七甲山稅三畝


三分三厘六毫並書墓左俾遠近觀者預知敬避焉於是乎記
銘曰

惟地之精 惟山之靈 公藏於此 代出奇英

道光甲辰恩科鄉副進士族孫 源頓首拜撰

同治七年歲次戊辰正月

二十三世孫 興顯 秩開登顯等全立石



十四世敬臺公淑配謝氏墓誌銘

孺人謝氏乃郡庠一湛公之淑配也賦質慈柔事翁姑以孝處家室以和恪修閭職故一湛公無煩內顧得肆志於藝林焉及公既沒後孺人以母道而兼父道培育子孫俾克成立故繼繼繩繩並采芹英孺人之力爲良多也而其錫福於後正未有艾以孺人之德卜之矣孺人原命生於嘉靖辛丑九月十三日終於崇禎三年十二月念八日戌時享壽九十歲奉葬於波泔鹿岡逕牛頭嶺與夫穴相連懇山稅三畝三分三厘六毫生一子諱應璉邑庠並書於墓以垂不朽

銘曰

吉地綿綿

謝氏藏焉


子孫昌熾

福祿長延

道光甲辰恩科鄉副進士族孫源頓首拜撰

同治七年歲次戊辰正月二十三世孫興顯登顯等仝立石

秩開



十五世映漢公暨楊氏合墓誌

公諱文燦

字奇偉號


映漢乃虛川公之元孫也公少英敏嗜學年甫弱

冠卽善屬文游庠食廩後刻苦加功學益深邃惟限於命不下十戰棘
闈而終弗售僅應康熙四十七年歲貢識者嘆之淑配孺人楊氏娶城
內北門山頂坊德性溫和克勤克儉紡織之餘往往挑燈以助讀洵不
愧內助之賢至今猶嘖嘖焉公生於崇禎丁丑年五月初二日丑時終
於康熙癸巳閏五月二十二日申時壽七十七歲孺人生於崇禎戊寅
年十月初四日午時終於雍正三年正月初三日酉時壽八十八歲先
後合葬於員岡鄉墩頭口出水蝦形坐辰向戌在員岡鄉之側群屬耳
目與僻野異故久未立石逮年來孫曾日益繁人事日益興予先考

諱錫乃公之孫雖已出嗣而予之幸叨鄉薦識者咸謂由公發祥焉房之尊長故囑予記之以垂久遠云爾

乾隆戊申科舉人黔江縣知縣十八世孫縝頓首拜撰

嘉慶五年歲次庚申仲冬穀旦立



十六世美章公墓誌

公諱綸字美章號翊唐乃十五世祖王臣公次子藻章公胞弟邑庠玉

階公之孫邑庠聚五祖之曾孫也公素性醇樸恭儉慈和享壽八十五

歲生於康熙丁卯十月廿二日終於乾隆辛卯四月初九日葬於員岡

西方墩頭口坐辰向戌之原淑配謝氏孺人葬於甕岡路邊午向兼丁

生三子揚舉卜舉枚舉公穴南邊第一穴係公之孫應贈宣德郎傳輝


公墓第二穴係公之子枚舉公墓第三穴係枚舉公配程氏孺人墓第

四穴係公之孫殿輝公墓第五穴係公長子揚舉公墓第六穴係公會

孫俊英公配何氏墓第七穴係公會孫廣英公墓今恐日久錯認均刻

諸石以垂永遠

同治十三年歲次甲戌城內蒼角坊裔孫全立



十六世美章公配謝氏墓誌

孺人謝氏乃高明城內蒼玉坊美章公之淑配也孺人淑慎慈和柔嘉
爲則生于康熙己巳正月十六日終于乾隆己巳五月念一日享壽六
十一歲葬于甕岡大路旁丁向兼午之原至公則葬員岡墩頭口生子
三長揚舉次卜舉三枚舉孫五人光宇光宗同案進庠萬春光代光邦
俱職員曾孫俊英廣英凱英壽國學貽贈修職郎璋修選巡政廳瓚國
學儲贈宣德郎直隸州州同杰國學子孫濟濟忠厚成風識者知其祖
德所積之厚而流自光將來長發正未艾也予秉鐸高要兼理端溪監
院事因見亭宗兄請誌於予予故樂爲誌之

誥贈戶部尙書乾隆癸酉科亞魁特授高要縣儒學宗姪家政拜撰

咸豐七年後原碑因世亂被毀同治八年己巳歲季冬重修


爲翰職員

蒼玉坊玄孫

爲龍歲貢

等立

爲屏職員



十六世祖君翰公墓誌

公諱殿垣

字

君翰

號

蓋臣廼十五世必達公嗣子歲貢序選儒學文燦

公長子歲貢任同安縣訓導太兩公玄孫高明城內學前坊人也公素性忠厚勤儉持家生于康熙乙巳三月廿一日終於康熙癸未五月初四日葬於佛坑坪太兩公墓後左壙與守昌同穴坐壬向丙兼亥巳之原淑配謝氏孺人乃任賓川州知州旻禧公長女生於康熙甲辰正月十七日終于康熙戊寅六月十五日葬高要九曲逕土名王坪騎龍枕官格生二子長曰佐武次曰錫元夫人之苦心孤行生前匿跡銷聲不欲彰顯於世及身後則湮沒無存其德之潛而不發者何可勝道今觀其子之佐武任勞任怨卒成懿行而知公之庭訓有方其貽謀遠且

大也佐武上承先志多年積蓄創建平川祖祠又多年積嘗而春秋享祀不忒是子之善述端由父之善作公其潛德滋多乎予粵西人也官忝郎中甲戌歲由京旋鄉路經東省主於灼翁談深知己相聚兩旬因囑墓記於予予爲公發潛德之光爰爲表之誌之以爲世之忠厚積福者勸

丙寅科舉人刑部郎中世愚姪黃肇仁頓首拜撰

光緒元年歲次乙亥仲秋穀旦

十六世君翰公配謝氏暨媳楊氏合葬碑誌

謝氏太安人者廼任賓川州知州旻禧公之長女皇祖君翰公之配也
生於康熙甲辰年正月十七終於康熙戊寅年六月十五日子二長
曰佐武邑庠次曰錫元而錫元公淑配楊氏老安人廼丹徒縣知縣元
復公孫女與謝氏太安人同墓生於康熙乙亥六月十八日終於乾隆
庚辰年二月初九日子三長曰騰萬次曰鳴瑞三曰叶飛姑慈婦孝
和順厥家徽音克嗣焉乾隆癸亥年合葬於高要九曲逕山形騎龍枕
官坐己向亥兼巽乾三分之原峯乾隆癸丑十二月初七日騰萬等入
墓勒石用誌不朽

乾隆五十八年癸丑季冬穀旦學前坊裔孫等重修



十六世祖應鳴公墓誌

公諱應鳴

字

士升廼邑庠屏畿翁之季子也世居屏山村淑配余氏生

二子長允燕次允鎮

公生於嘉靖癸亥年七月初七日吉時生平志

切詩書而素願未售迨終葬在土名蘭頭塘金水結穴美女梳粧形丙

向兼午之原福澤誠靡涯耳余生也晚不獲親覩公之典型幸得與

公之子若孫共訂知交以故或觀光於上國或泮水而生香師師濟


濟豈非

公之貽厥孫謀乎余情意相關義弗容懈爰爲之誌曰瓜瓞

綿綿子孫振振克昌厥後祐啓我後人以永垂不朽云

鄉進士出身候選知縣年愚眷姪程達頓首拜撰

乾隆三十二年歲次丁亥孟冬吉日



十七世祖覺世公續配馬氏墓誌

太淑人馬氏乃覺世公續配學前坊人也夙聞覺世公仁孝性成正直剛方以振興族運爲己任不避嫌怨而馬氏太淑人內助有成予考之羅族家譜而得其概矣公當日志切建平川祖祠將荔枝樹數株售錢數十貫生息十年積錢八九百貫時遇凶荒族人欲瓜分公不允好事者以磚碎其瓦面而太淑人不與人爭好事者又鼓衆婦人吵鬧其家庭而太淑人婉詞以導公又苦心積嘗任勞任怨春秋祭祀有產而太淑人甘于淡泊柔順慈和克盡婦道仰承夫子之志俾建祠積嘗均賴有成焉是太淑人淑慎姆儀內助賢著真堪爲人範者歟宜其受福無疆龍章寵錫以曾孫焜燿貴誥贈三品淑人而元孫星垣縣試冠軍

探芹生香將來孫枝暢茂繼繼繩繩奕世簪纓其發祥正末艾也公生
于康熙庚午八月念七日終于乾隆辛未九月念六日原配杜氏太淑
人葬于禾倉圓岡仔金鼠格而續配太淑人生于康熙戊戌年 月

日終于乾隆庚辰年十二月念九日葬于新墟三百桂青龍砂仙人
擺袖格坐丑向未兼癸丁之原生子元聲孫宗祐濟舉秀舉誥贈中議
大夫晚與灼齋翁世好囑墓誌于予予不揣固陋爰爲誌之

甲戌父子同榜進士朝考 欽點山東知縣世姪梁嶸椿拜撰

癸酉拔貢連科舉人甲戌父子同榜翰林院庶吉士世姪梁廷棟拜書

十八世挺才公暨劉氏墓誌銘

公諱上哲字挺才號卓齋國學乃朝端公之十八世孫也世居范洲星

岡坊幼而敦敏壯遊西粵掌管鹽關家稱豐裕仗義好施晚而居鄉事無大少悉與維持故州黨稱爲長者公生乾隆戊子六月廿九日終道光乙未八月十二日享壽六十八歲原葬百足嶺後遷葬雙對岡劉氏墓左妣劉氏老孺人勤儉持家相夫以道生乾隆庚寅九月十七日終道光辛丑四月十七日享壽七十二歲合葬雙對岡坐丙向壬兼己亥之原來龍由陳等跌斷穿田連起一山翻身逆結水聚天心眞美地也原係龍山梁先生點穴與下陳等承買地段有讓帖書明山壙外另前後左右四至數丈永爲羅姓所管卽時備送山價銀二十元上陳等要

將山價均分彼此爭論竟至據戈我祖不忍坐視情愿再補銀二十元
勸其兩造釋爭非所謂心田福地世德作求者耶公生二子長棟英邑
庠生次傑英國學生孫八人曰顯朝處士曰炎國學曰遇朝處士曰錦
國學曰陞朝力農曰匡朝處士曰榮耀曰榮瀚俱國學會孫十八人高
深國學高澤職員高濤歲貢高才國學玄孫十八人仍孫六人或壯而
執業或總角受書或孩提待抱又况濟濟孫枝蒸蒸日上盛知積善之必
有餘慶也素欲修墓勒石以垂不朽適當修譜諸叔兄囑予作誌予特
詳其巔末俾共識祖德之厚祖澤之長因爲之誌而繫以


銘曰

美哉此地 渡峽穿田 翻身降勢 結穴臨弦

砂環局內 水聚堂前 先靈既安 錫福無邊

光緒三十年歲次甲辰吉旦曾孫歲貢高濤手拜撰





其賢而慶之也慶之者實慶其可爲後人法可爲天下法也公生于乾隆庚寅六月初一日終于道光丁未十一月十四日享年七十有七配阮氏生二子長爲龍甲寅歲貢次祥天孫文錦廩貢分發高州府卽用訓導寬職員曾孫紹昌之綱生員繼昌之經之綺之煥等雀躍林立余安得不詳而記之哉余與文錦辦地方事相處日久故知之眞而言之詳再閱二年在羅定州署而稿始成夫亦宦途深而鄙陋貽譏云爾署羅定州知州前任高明縣知縣郝有金拜撰

同治十三年甲戌歲仲夏吉日裔孫文錦錫錦等仝立



十九世南山公墓誌

南山公歿葬於官逕梅花塘余同治二年甲子秋奉 委蒞任斯土接

篆後各局紳條陳地方要害時大同賊搔擾更合鄉村會同諸紳文錦等親往合水勘看十八處勇卡實力防堵乙丑三月卓鎮軍屯兵新興征剿五坑老窠時值清明文錦掃墓而回面商添勇卽往合力圍攻朝夕在行轅由更合而新興恩平同居數月公間後文錦請先祖墓誌於予予按而嘆曰夫誌者記其賢以垂後亦誌其賢以風世也溯公之始祖有諱朝端者由鄉貢而任德慶府同知公之十一世祖有平川者邑庠生由員岡而遷居城內世住蒼角坊廼美章公會孫枚舉公嫡孫應贈宣德郎朗軒公長子也歷代忠厚起家賢聲卓著是有開必先也公

諱壽

字

永英天性聰敏能任大事以房叔栗亭候補四川知縣邀公同

往棄舉子業隨任黔江一切政事盡心贊勸之德澤及民公之賢也吾其記之哉公歸省親栗亭卸任卒於省垣毫無餘積妻子朝夕不給日抱孤子以哭適公至乃多方設策扶襯旋里公之力任艱辛不辭勞瘁公之賢也吾其記之哉公歸故里事親至孝在族中與順天興文興創諸人爲太祖積嘗建祠在坊內與李贊畧楊可元諸人埋會置產爲建醮酬神經費城中大小修舉公與有力焉公之好行善事可爲後人表率也吾其記之哉公與胞弟造英俱援例國學兄弟七十餘歲不分家產數十載同寢一室雍如也理勸親友患難排解必散憶度大小疑惑悉中先機公之渾厚精明可爲世人景仰也吾其記之哉記之者實誌

十九世祖考南山公暨阮氏太夫人遷移合葬御屏帳山墓記

易曰吉凶悔吝生乎動動則終凶風動則木拔水動則海嘯勢使之然也而於物也亦然樹搖葉落竹搖節破蜂屢易窠則無蜜蘭屢易向則無花亦勢使之然也而於人也亦然安居靜息身心俱泰遷徙靡定氣餒神昏地如不良禍必隨之陰陽同體斷無或異嗚呼其固然耶其偶然耶其抑或然而或不然耶我家自十九世祖 南山公宦遊四川後食先人福蔭者百餘年己亥先祖 錫錦公棄養先叔 之經 之章均壯年相繼病故孤侄寡孀十餘輩商業衰敗家產蕩然無存重以先伯祖 文錦公因復城被誣事曉楓訟冤不直羈押月餘家世凌夷一落千丈識者僉稱誤移御屏帳山所致嗚呼其固然耶其偶然耶其眞

有所據而云然耶何禍福立見如嚮斯應之無或然或不然也初南
山公葬梅花塘先叔斷其黃籐入棺啓視果驗後在官逕口覓仙人大
座一穴復以祖妣所葬之御屏帳山氣脉太小移之遂合葬焉未匝月
病者少壯死者中年訟者囹圄敗者產業天災人禍紛至沓來越年徇
家人之請再行遷移合葬於御屏帳山以謀最後之補救由是祖考離
而復合祖妣去而復回所幸舊痕深處尙有鮮潤土質尺餘保護先人
骨骸於不敝誠天賜也葬後家人安吉民國七年僱匠購石重修李省
長耀漢題其墓而爲之銘因想此山幾閱滄桑今始立於穩固地位世
情變幻大抵如斯但所最可痛心者祖宗數代所留貽之安全家世輕
心一掉幾致中斷經三十年維持培養尙未能得回元氣復我舊觀悵

觸前塵眞覺不寒而慄也吾因之有感矣天下事盛衰得失之故其理雖出於至顯其機實動於至微宋之南渡周之東遷論世者不俟其社屋邱墟已早有國家將亡之懼蓋基礎亂動棟宇易傾理有固然事所必至地利相等尙多奇變如有軒輊勢難自存御屏悵山之過去歷史亦可作如是觀也茲特記其事之巔末昭示後人並爲世之亂移祖山者告

民國二十一年


歲次壬申

夏月

二十三傳孫

曉楓

謹記



十九世祖南山公配阮氏合葬墓誌

高明羅氏者豫章其始也宗末美公從新會萌底來子孫分五房遂世其居長房朝端公支派最盛十九傳誕生

南山公公

諱壽

字

永英

號

南山少聰穎積學而不汲汲於科舉隨族人羅縝宦遊四川黔江公牘多出其手旋因事回粵羅縝卒於任公捐資入川奔走七閱月撫孤運柩而歸蜀人今尤豔稱之性至孝母疾衣不解帶者五年同胞兄弟二人公居長終身未嘗勃谿天性厚也公之性雖極和平治家則嚴厲無似長子爲龍公登歲進士後偶因出街事忙未有稟命尙援出必告返必面之成例鞭撻隨之其嚴憚有如此者前清道光丁未年十月十四日以國學卒於鄉公生於乾隆庚戌年六月初一日享壽七十七歲因


令嗣爲龍公令孫文錦公身登仕版例贈修職郎奉直大夫太常寺博士各等職銜復因曾孫之章公應甲午科鄉薦誥贈文林郎原葬於官逕梅花塘光緒三十一年令元孫曉楓先生遷葬於御屏帳山名黃蛇搶蛤坐巽向乾兼巳亥與妣合墓 妣阮氏生於乾隆壬辰年十二月初四日終於道光丁酉年正月初九日享壽六十六歲民國七年曉楓先生回鄉修墓耀漢與先生同鄉且任省長後諸事仰承策劃得此機會時相 接洽故知其家世甚詳爰掇筆而表彰之益信修德獲報之說之大有可憑也


銘曰

以山發人 以人得山 離而復合 福澤攸關

我爲山祝 名著九寰 我爲人祝 勳位榮班

民國七年三月吉日廣東省長李耀漢敬撰政務廳長梁日東拜書





二十世祖妣夏氏墓誌銘

羅夏氏廼白沙鄉邑庠士夏晃公之女勅贈修職郎諱見龍公孫媳敕

授修職郎惠州府河源縣學訓導兼署教諭事加三級諱雲公之媳郡

庠生定南翁之原配也余秉鐸斯土定南晉謁以同宗故常往來余見

其家學淵源書香不斷嘗詢其前人厚德故夏氏之行余知之最悉夏

氏生而婉婉賦性溫厚迨于歸我羅族孝順慈和以執婦道宜其克昌

厥後也生于乾隆庚子年五月廿五日申時終於嘉慶壬申年二月初

四日午時享年三十三歲葬于較場後土名湖面坐艮向坤兼丑未之

原生四子曰晉曰熒曰源曰鵬一女適濠基付貢生榮春譚君之配茲

其子晉等重修此墓請余爲誌以垂不朽余是以欣然樂道并爲之

銘曰

美哉此土

夏氏藏焉

英靈常在


於萬斯年

蘭桂競秀

福祿綿綿

己酉科舉人截選知縣特授高明縣學訓導加三級宗愚弟廷桂頓首
拜撰

己卯科恩進士特授高明縣學教諭加三級年愚弟蔡侍慶頓首拜書



二十世祖見亭公墓誌

公諱爲龍

字虞天號

見亭歲貢生廼明城中蒼玉里國學士儲贈修職

郎南山公之長男也公性成孝友節概端方英資敏達工舉業外天文地理無不深究所謂通天地人者謂之儒公殆其人歟年弱冠掇芹香補廩餼人咸器重之謂鵬程遠到可拭目俟也奈學博而數奇艱於一第咸豐甲寅乃登歲薦迨丁巳歲客匪倡亂我邑中上坊田里廬墓被賊佔踞鄉人流離轉徙者數年辛酉公首倡大義聯合要明兩縣紳耆控奉 各大憲給諭團練以圖恢復公乃與諸同事選練勇籌軍餉決策捕剿隨官督陣者八年方能蕩平賊巢稟奉 各憲盡將賊黨遣散外郡收復土人田里以卽於安集所謂出水火而登衽席非公其誰克

當之耶庚午春公仍辦善後局務因勞成疾遂赴玉樓之召卜葬於宋坑象岡坐乾兼戌之原夫根深者蒂固積厚者流光公之德旣懋於當時其福自當綿於奕禩今子若孫登仕途列鬣序濟濟一堂之盛豈非公之貽謀者遠哉茲公之令長君因議修公之墓囑余爲志余與公少共筆硯老同辦公誼固不容以不文辭因述其生平以示後人永思焉公生於嘉慶戊午年十一月初二日終於同治庚午正月十三日享壽七十三歲公配謝氏生子四長文錦次應泰三寬四濯錦孫紹昌之綱繼昌之經復賢炳賢曾孫鼎新並壽諸石以垂永久云

丙辰歲貢序選儒學愚弟劉鳳洲拜撰

二十一世睿明公墓誌銘

公諱性聰字睿明號哲士廼太平都充美鄉善吾公之裔孫也歲在辛丑序屬仲春公之次子拔光鄉賓議修其墓請誌于予予秉鐸斯土惟有歷年聞公素行鄉閭同稱適于是月之初曾到山所猶憶肅拜之餘見其玄武來龍起伏曲折一如田螺吐靨之形生機活潑精氣結成及轉身而看又見其開口吐唇沙灣水抱對面峯巒端拱羅立予閱名墓多矣如公窀穸之地真所謂天造地設有目共賞者以是知公之生前必有賢德然後有此吉地也于是奮筆而爲之銘曰

田螺山名

吐靨如生

十分稅地

萬載佳城


可知其前

賢德有聲

可知其後

代代簪纓

道光乙酉科舉人特授高明縣儒學訓導宗姪廷桂拜撰
此地道光七年買受橋頭村夏敏官秧坎稅壹畝零五厘



二十一世祖源公暨譚氏合墓誌銘

公諱源

字

衍賓

號

星海甲辰

恩科副舉人乃郡增生定南公之三子

歲貢任河源縣訓導雲公之孫高明城內蒼角人也公英年嗜學早歲能文游泮食廩後學業益精相待以大器奈數奇不遇道光甲辰乃誤中副車生平孝友人無間言至其講學循循善誘故桃李多出其門著有周易日講四書精義等篇行世是公之品學兼優都人士稱爲金玉君子者長子名先邑庠裔孫擴武庠衣冠濟濟皆公之盛德致之也以是知世德作求方興未艾自必有發名成業爲盛德光者以纘承勿替焉淑配孺人譚氏溫和淑慎勤儉持家有條有理無煩內顧之憂洵內助之賢也余忝屬宗親甲辰闔族脩譜與公賢裔仁樞兄論述之餘議

修公墓囑余為誌余雖不文而誼不容以不文辭因述其生平以為世之脩德蔭後者勸公生嘉慶戊辰五月念七終同治戊辰四月念一氏生嘉慶丁卯四月初五終同治丁卯正月初五俱享壽六十一遷葬城北丫公鬚脚土名網墜坐北向東南之原公之獲此福祿來崇余欣然誌之並為之銘曰

鬚岡綿綿 吉地藏焉 子孫昌盛 於萬斯年

二十三傳房侄孫邑庠生湘瀾頓首拜撰

光緒三十年歲次甲辰季夏穀旦裔孫擴等重修泐石

二十一世綱齋公墓誌

敕授奉直大夫儲贈文林郎由廩貢歷任長樂乳源教諭

諱文錦字書

錦號綱齋羅封君以光緒丁亥葬城西磨刀坑象取僊人佩劍坐乾向

巽兼亥己之原越戊戌哲裔之經之章重新 巽序公暇以修墓事聞

因思蔭甲任後每遇之經昆仲如飲醇醪興學辦團皆夫人力知 封

君必有大德以貽之也遂博採輿論備悉司馬生平 封君性仁孝治

家極嚴族人不衣冠不敢見遇事有容人量尤敦善行爲衆倡內而建

祖宇送學田外而創立帝宮修文昌臺剏城樓及武帝廟邑人津津道

之平居掛劍讀書制藝外好談兵法初咸豐甲寅紅匪倡亂越丁巳客

賊繼起糜爛中上兩坊迄無完瓦 封君承先大夫爲龍公命奉 憲

團練羅致曾何馮麥諸哲學爲邑中靖難興師計血戰者十三年恢復者百餘鄉決策運籌惟 封君是問故榮哀日邑人輓曰仗三尺劍復百里疆其造福地方如此以是知 封君之德之大也夫士君子生擾攘世以巨眼洗新天地非高世才曷克與於斯况不旅一衆不成一田徒手奏功史册尤未易數數觀昔翁司農題曾文正癡心爲國隻手平虜願以斯語移贈封君諒非河漢嗚呼品望若此勳業若此殆窺曾侯一班者歟抑聞之明德之後必有達人今 封君賢裔之經充郡學廩生之章舉甲午孝廉男孫七人英氣皆不可迫視濟濟一堂之盛詎有艾哉吾愈信 封君之德之大且遠也 封君生道光辛巳十一月十一

一日子時終光緒丁亥閏四月初七日寅時春秋六十有七聞死之日

前任唐令暨陳教諭陳訓導陳城守徐典史踵府致祭闔邑搢紳祖道

東門外邑人於崇報祠奉祀設牌誌不忘也蔭甲為一邑宰封君有


大功德於邑例應表而出之並誌之為都人士勸遂作墓銘銘曰

高山蒼蒼 明水茫茫 龍飛千里 劍氣光芒

獅鳴象伏 虎豹珍藏 為公裔祝 食報綿長

光緒 戊戌 正月 穀旦

賜進士出身現知高明縣事安定安蔭甲頓首拜撰



二十一世祖妣楊氏墓誌

太夫人楊姓少時以和靄溫厚聞於鄉豫章錫錦公性剛直遇事不假詞色 太夫人于歸後處之泰然終其世未嘗勃谿守以順爲正之婦道也惟訓子則極嚴哲嗣之綱公之綺公就傅於外回家後必令日夜溫習 太夫人則席地課織以監督之哲嗣文學冠時皆受母教之賜不幸哲嗣相繼中年病故遺下曉楓晴峯兩孫均未成年且質弱而多病他人方姑息容縱之不暇 太夫人對於教讀一事嚴厲如前令孫曉楓先生今日得以文章焜耀民國其淵源固有自來也 太夫人生滿清道光己丑年二月初八日吉時終滿清光緒丙申年十一月二十八日未時享壽六十八歲原始安厝縣城北門外南蛇滾浪之東遷葬

龍堂村前山形寶鴨落池塘坐乙向申兼辰戌貞前督辦西江軍務

聞 太夫人相夫課子之道之足以風世也故誌其事而為之銘曰

翳婦德之邁眾兮

復和靄而端莊

其教子與課孫兮

實女界之津梁

看孫枝之挺秀兮


知積厚必流光

葱葱鬱此佳城兮

卜厥後之克昌

民國二十一年秋月

粵軍第二軍軍長 肇羅陽綏靖督辦 順德周之貞拜撰



二十二世之綱公之綺公合葬墓誌

中華民國六年

炳焜

奉陸巡帥命督軍粵東未蒞任前巡帥語余曰廣

東人最複雜求一熟悉地方情形而人品端正者舍省會議長羅曉楓

外不多覲接任後宜善事之

炳焜

到粵之第二日派秦參謀長馬總司

令先後拜會越四日延見於督署辦公廳飭聞軍事財政計劃甚詳聘

爲督軍高等顧問則不受任爲全省警察廳長則不受嗚呼其才學之

優秀若此品格之高尙又若此天生特質豈偶然哉語云明德之後必

有達人知其先代之留貽定有大過人處也秋後議長以修墓事聞

炳

焜向不迷信風水但形勢爲兵家所樂談其義本可相通故索閱山圖

代爲佈置並知此山爲議長先君與先叔合葬地訪諸輿論知其先人

高日錄 卷之六
之道德與學問均皆卓越恒流更樂得叙其巔末以風當世謹分記其事於左

穴之左葬之綱公

字

矩昌

號

燮臣議長令先翁也十九歲進庠充邑廩

膳生熟讀經史制藝負盛名爲呂拔湖廖鶴年諸宿儒所器重事親極孝每朔望必具衣冠叩首問安出街與尊者相遇鵠立道左得尊者命始敢去每年冬季散館後聚族中子弟於祖祠而教之不受束脩因此而成學者極衆行年四十卒以廩生終世焉溯公生於前清道光己酉年十月二十二日亥時終光緒戊子年四月十一日子時本山在大壩后山名爲仙人擺臂坐壬向丙挨子午之原宣統元年始與胞弟之綺公遷葬於此穴之右葬之綺公雲裳其號也公生於同治丙寅年三月

二十四日丑時終於光緒甲申年七月二十日酉時歿之年一十九歲
公聰明絕世好學不倦天性又極和平敦厚竟不永年邑人多痛惜之
九月墓成除備物致祭外更樂爲之銘其詞曰

天地之道

高也明也


山川鍾靈


博也厚也

垂裕後昆

悠也久也

民國六年九月吉日 上將銜廣東督軍陳炳焜撰並書





二十二世之綱公之綺公合葬墓誌

煊懼袁賊之將帝也設都司令部於肇慶以擊之高明曉楓議長共事
五閱月公暇以先翁先叔修墓事聞並將陳督軍所撰大榔后山墓文
示煊接讀再三不禁喟然興嘆曰人生壽數之修短對於國家命脉殆
有密切之關係乎 之綱公幼而慧經術湛深弱冠負著作盛名孝友
尤出於天性 之綺公精舉子業記憶力之強固鮮有出其右者設生
而並世各出其聰明材力爲國家宣勞固不獨羅氏之榮亦我中華民
國之所大幸也乃竟天不永年惜哉生終年月墓地坐向等等詳於陳
督軍墓文恕不贅銘曰

地屬高明


人極高明

雙峯並秀

兄弟齊名

天胡不吊 喪此奇英 卓哉賢裔 大慰先靈

民國九年冬月前兩廣四川總督現任兩廣都司令岑春煊拜撰




像讚

卓齋太姻翁像讚

維神是肖卽貌而尋有神有貌宛見素心魚鹽壯志西粵德音香生璧
水蔚然士林鮮慾寡嗜喜飲細斟好施義取州黨同欽宜爾令範孫子
照臨我思其人鴈杳魚沉

道光辛巳解元揀選知縣姻晚生區慕濂頓首拜題



誥授中議大夫候選知府灼翁世伯羅先生像讚


恭惟

世伯慧質聰敏骨秀神清深謀遠慮應變靈明治家整肅衆善奉行孝
親養志友弟恭兄義隆報本 誥贈寵榮第稱中議四代揚名置嘗興
學宗族怡情箕裘薄蔭振業羊城松江八載家道有成方便積福遠邇
同聲樂此不疲洞出至誠况

令配世伯母相夫以順如梅和羹待妾以恕大小和平宜家官室淑氣
滿盈丹青逼肖穆然含精久於其道壽比老彭宜乎桂子大展鵬程預
卜雀躍奕世簪纓

賜進士出身翰林院庶吉士愚世姪梁廷棟頓首拜題

日新...
...




廣文絅齋翁羅先生像讚

恭惟

絅翁沉潛力學苦志名成小心事祖閭里同聲承歡膝下孝道肫誠五
年逃賊遇難艱貞奉 憲起練闔邑歡迎六千鄉勇視死如生甘苦備
歷血戰齊盟金木水火疊作奇兵枵腹固守步步爲營三山保障兩縣
長城矢公矢慎遇變不驚寬洪大度更羨靈明任勞任怨廿載堅精臨
事立判決不徇情地方綏靖巨亂克平建祠修墓妥侑詩賡刊譜興學
衆善奉行隱居教職初授

恩榮丹青宛肖渾穆神清儲材備用河岳聚英鹽梅調鼎堪作和羹
天朝柱石萬古流名


壬戌科舉人刑部郎中愚弟黃肇仁拜題



家耀公淑配梁氏太孺人像讚

繫節婦是賢母折櫻畫荻聞來久教子有義方徽音垂不朽桂子並蘭
孫讀書探二酉蜚聲郡邑庠所學良不負繼盛及曾元益徵坤德厚

光緒乙未重九肇慶府儒學海陽王 洪拜題



壽文

葉太宜人八秩開五壽文

家人繫易厥有嚴君魯頌稱詩爰歌壽母若乃慶由善積福自天申綵
炫萊衣桓少君未忘挽鹿歡承萱草韓夫人尙憶熊丸此則聖善徽音
璜瑤式焉而靡忒思齊令德彤管紀之以無窮也矣我

叔祖母葉太宜人乃

叔祖爲松淑配也系出忠義名門英鍾滄水


品符母儀懿行德著玉山幼而婉婉長益柔和二南季女之有齋蘋錡
藻釜七篇大家之鑄誠粹杼鷓筐洵哉姆教勿煩展也禮宗不媿及夫
雁鳴迨吉鴻漸于歸 叔祖和止之期屏間射雀 叔母穠矣之日幔
裏牢絲入侍舅姑溫清夙虔于昧旦歸寧父母定省無懈于晨昏及其

事我 叔父也親操井臼惟守清白家風穿着布衣絕無貧苦顏色聞
鷄聲而戒旦貿易知難覓蠅利以養家春織罔間相敬如賓舉來鴻案
修容滅火進以鴛槭名重伯鸞琴瑟有助譽隆寵德中饋不凡數十載
由約而樂勤儉自持千百家雖遠猶邇雍和共羨所由俾熾未涯延祺
益固 龍章寵錫榮膺 皇命之頒 鳳誥重申疊荷 華袞之賜令
子多才樹奇勳於民社諸孫奮志爭捷足于雲衢慰懷如此杞梓蔚以
成林點頷怡然芝蘭深其繞砌齒滿七秩宣文君步履猶便壽開八旬
萬石樞神明殊勝四代一堂之子婦魚軒象服之扶持烏私惟慰鵲躍
尤深以期難老祇須餐度索之桃用卜遐齡詎假餌安期之棗茲者同
治六年歲次丁卯九月仰瞻 叔祖母欣逢設悅之辰闔族 衆 衿耆共

效承筐之祝竹苞松茂地靈鍾不老之祥川至日升天運肇長生之慶
轉盼秋風薦爽天姥星明本同樟木分枝婺宿長照敬揄翟芴芳芳用
佐蘭陔洗腆二首六身之甲子古已稱稀八千五百之春秋今當以俟
兕觥既酌鞠脰而拜岡陵鐵笛能吹鼓舞而申頌禱

道光甲辰 恩科副舉人姪孫 源拜撰

一
日
新
刊
方
言
卷
之
一



誄文

門生張一坤祭虛川公誄文


維

萬歷二十三年歲次乙未孟冬庚子朔越廿九日戊辰

賜進士第嘉議大夫

欽差整飭兵備兼分巡嶺西道廣東等處提刑按察司按察使門生張
一坤謹以束帛香燭致奠於

承德郎虛川翁羅老師之靈曰我師員山孕秀珠海呈祥岐嶷卓異倜
儻非常豹文日耀鳳翮高岡蜚英鬣序劍氣光芒藝林赤幟文苑飛揚
胸藏武庫志貫穹蒼賢書早著昂首龍驤春官兩上捧檄鵷行山陰振



鐸蘇胡教昌望高北斗行凜冰霜琴鳴龍邑卓魯聲張俄而解組泉石
流觴二疏遺風五柳標芳明農而後十畝徜徉惠流子姓遍沐宗祊塔
興文運堤護農桑橋梁普濟萬載慈舫經學鐫鏤什襲珍藏儒宗淑世
笑傲玄黃卷舒自得玉質金相展哉古行模式閭鄉薦紳景仰後學表
坊一坤昔忝衿佩辱在門墻春風披拂倖爾翔翺久睽道範瞻戀靡忘
茲叨憲節渴欲登堂觀風三玉期覲台光胡天弗眷哲人云亡丰儀仰
企耿耿心傷想先生之風山高水長先生之澤蕩漾汪洋先生之裔家
學青箱玉樹奇偉蘭蕙輝煌千秋奕葉萬古留香束芻躬獻聊效衷腸
英爽如在來格來嘗尙

饗

誄文

闔圍

紳耆祭順天翁誄文

維

道光十二年歲次壬辰仲夏丁未朔越祭日壬子廼

皇清鄉飲大賓 順翁尊世長羅先生大人三虞之辰愚弟

夏鴻彥
夏宏開

譚宏後
譚儒英

夏天保
陳一鴻

與祭

譚十猷
夏奇觀

陳紹曾
夏德新


等謹以香燭楮帛牲醴菓品之儀詣

靈而誄曰昔范史搜紀潛德率多可採獨不為馬少游立傳既而思其

為人所謂衣食裁足鄉黨稱善人者其歸真返樸至意為節義先聲實

與桐江一絲相為表裏今我公足為蔚宗一訂其謬也公少力學卓有

成就而艱於一遇都人士咸惜之生平讀書督務而外惟以延師課子



爲事故都中培風敦俗扶獎文教諸務惟公與有力焉是以年彌高而德彌邵邑中舉賢良方正咸以公爲首舉誠以公德望見重鄉邦足膺是選者而公亦慨然就徵冠帶顯揚人士且與有榮施焉嗚呼其逃名深者其收名也遠俗士偷爲一切依阿洎忍類以爭名釣譽爲高我都風俗淳樸士思各自樹立賴公古道起頽靡而振之當不類漁陽羯鼓也今公虞辰聊效鄉先生歿可祭於社之義且以明雖無老成尙有典型若以謂羊曇醉路哭慟西州不約而同猶是區區私情耳九原可作其然斯言否哀哉尙 饗

闔族 耆祭順天公誄文

維

道光十二年歲次壬辰祭日壬子陽中愚兄宏彥

韶美 德甫

可舉 興創

舜樂 懷遠

愚弟

棟英 承英 大經 凌霄

仲堯等謹以剛鬣柔毛牲醴庶饘菓品香燭楮帛之儀

致祭於

皇清鄉飲大賓 順天賢弟家先生之靈曰嗚呼豪傑淪亡兮競渡傍

徨人壽幾何兮薤露草霜鄰人有喪兮杵不相况屬宗枝兮淚偏長緬

賢弟之賦性兮直義堅剛應務與接物兮正大堂皇拜大賓於庠門

兮善俗型方勤儉持家兮積貯深藏聯宗族於追遠兮建設產嘗創家

廟於孔堂兮計慮周詳宜乎子孫雀躍兮桂馥蘭芳頭角崢嶸兮門閭

輝煌是宜介眉益壽兮歷久康強惠迪則吉兮余族是倡無何年未古
稀兮琴在人亡痛賢弟之忽逝兮淚洒悽愴痛時命之有數兮音容渺
茫揆達人之積厚兮厥後必昌天將留一席兮預待徜徉表宗族之素
悃兮爰薦馨香嘉二十載之勤苦兮虔奠清觴望賢弟之跨鶴兮鑒

我衷腸哀哉尙饗

闔都 紳耆祭興文公誄文

維

道光二十三年歲次癸卯仲春中浣祭日癸卯鄉愚弟陳一鴻譚士猷
夏日明等謹以香燭楮帛牲醴菓品之儀致祭于

皇清邑賓

號

卓爾羅公之靈前曰嗚呼人之死也亦大矣豈不痛傷哉

特以其人無行可稱斯有憾於穹蒼耳若 公之生也胸懷磊落品行

端方宿儒望重邑賓名揚釋躁平矜待人柔順解紛排難處事堅剛督
理基堤建功勳之莫大倡起義會普利賴于無疆而且月課有規詩書
崇二酉之實時祭有典鷄豚習五戊之常嗚呼公之立德如斯方祈永
命何天之忌才若是竟入仙塲豈修文其有召乎何長逝而令我不忘

也所可慰者長子象賢已遊璧水令孫雀躍卽步玉堂况此日地叶牛
眠人瞻鶴輦知他年榮封馬鬣叠誥 龍章則公雖在九泉下應亦百
世而流芳者矣余等遙思大德幾斷中腸撰俚言之數句奠清酒以一
觴靈其有知來格來嘗哀哉尙 饗

闔都 紳耆祭興文公淑配潘氏誄文

維


道光二十四年歲次甲辰仲秋下浣祭日甲子闔圍紳耆陳一鴻譚士猷夏日明等謹以香燭楮帛牲醴菓品之儀致祭于

皇清九品孺人羅府潘氏老孺人之靈前曰從來綿似續者恒多內助啟後嗣者每籍姆儀緬維 孺人毓自名門于歸望族事翁姑固以孝

著待妯娌又以善聞相助其夫邑賓望重教訓其子國學名揚余等誼

屬桑梓情繫葭莩挹口碑于密邇實耳熟于疇曩雖寶婺星沉光華難再而琬琰模在懿範常存德既鍾郝可方譽亦彤管莫罄一時垂則百世流芳嘆西歸兮未久令東望兮不忘尙

饗



維闔都 紳耆祭大新公誄文


道光二十七年歲次丁未季春下浣祭日乙卯闔都紳士譚士猷陳紹曾夏德新等謹以香燭楮帛牲醴菓品之儀致祭於

皇清國學生號煥亭羅公之靈前曰嗚呼人之修短有命豈容強哉緬

公之生也始而力戰文壇有志未逮繼而功專武藝屢試不售遲之業精行成乃入泮宮而遊璧水焉且也居衷純厚處世和平以德若此固宜天假之年享壽遐齡無如花甲漸近病入膏盲延醫罔效竟以仙遊嗚呼公既逝矣能不痛哉所可慰者令嗣貫札穿楊才堪入選令孫垂髫總角質亦稱奇異日馬鬣榮封 龍章疊錫卽公在九京之下當亦怡然自慰耳余等忝屬同社茲當安厝之日用伸執紼之情敬數誦

句俚言直作千秋話別魂乎來格鑒此微誠嗚呼尙

饗



闔邑 搢紳先生祖祭星海公誄文

維

同治七年歲次戊辰仲冬祭日甲申陽中年愚弟劉 瑤楊枝秀劉鳳

洲鄧乃昌等謹以剛蠶柔毛牲醴庶饘菓品香燭楮帛之儀致祭于

皇清儲授徵仕郎甲辰 恩科副貢士 諱源字衍賓號 星海羅公之柩

前日嗚呼哲人其逝梁木其傾誰探學海孰領書城一空蕙帳永隔文

旌棄予而群離居索悵予而山高水清然生而碩彥死而精英其同乎

萬物者生死之形異乎萬物者不朽之名至今卓卓瑩瑩猶能髣髴公

之生平公名門宦胄士族簪纓生而穎悟性復肫誠篤孝於父堯恭厥

兄橫經書而枕菲荷筆硯而耘耕文宗史漢筆叱風霆爭古人之盛業

奮翰苑之蜚聲奈何副車誤中未便騎鯨棘闈十戰士類猶榮晚彌篤
學卓有典型後生小子仰如日星不憇遺一俛我老成致隕太白竟墜
長庚百身莫贖千樹鶻鳴浮雲黯黯慘霧冥冥然而公之文章不朽瑞
如芝呈公之品端行潔高若金莖斯足以壽世令人攄鬱結之幽情迄
今令嗣卓立書味寒擎蘭芬桂郁繼繼繩繩他日門閭光而頌
鳳誥尤足慰公之精靈于九京已矣哉川樹望而雲平霜露墜兮新塋
荒烟野蔓兮驚禽駭獸躑躅而伊鳴自古皆然兮何分韋布與公卿茲
感疇昔愴然執紼泣下而縱橫嗚呼尙

饗

闔邑 搢紳先生祭見亭公誄文

維

同治九年歲次庚午孟夏朔越祭日庚申陽中愚弟

張其典
區榮奎

楊枝秀
劉鳳洲

等

謹以牲醴庶饘剛鬣柔毛香燭楮帛之儀致祭於

皇清歲進士序銓儒學儲贈修職郎見亭翁羅先生之靈前曰嗚呼光
陰易逝百歲非長善人是與德眷彼蒼期頤上壽默鍾賢良惟翁天性
言表行坊惟翁接物度量包荒事親盡孝教子義方採芹食餼策對廟
廊調梅折桂人皆仰望齊眉舉案梁鴻孟光令嗣式穀振鐸名揚令孫
弱冠名噪膠庠古稀年逾身其康強司理公局決策疆場繭絲是任更
資保障人詛人祝聽之何傷難民安堵賴公贊襄自應太和保合壽比

老彭不料竟騎箕尾永赴仙鄉豈其修文有召惟翁細詳幸而芝蘭繞
膝聯步玉堂九泉之下疊錫 龍章雖死之日百世流芳今當窀穸
祖祭是將哀死術行失志彷徨牲牲肥腩寶帛酒漿率我同學奠君之
傍君其不棄鑒我衷腸哀哉尙

饗

誄文

闔族 衿耆祖祭秀舉公淑配葉氏太宜人誄文

維

同治十年歲次辛未季春朔越祭日丙申闔族衿老獻芳等謹以牲

庶饑香燭楮帛之儀致祭於

皇清誥封太宜人尊嫂葉氏老太宜人之靈座曰嗚呼惟我族尊嫂英
鍾滄水德著玉山質本端莊不待母儀之教性成婉婉無煩女訓之頒
入待舅姑溫清夙虔於昧旦歸寧父母定省無懈於晨昏及其事我家
兄也聞鷄聲而戒日貿易知艱覓繩利以養家春織罔間由約而樂勤
儉閨中履險至夷雍和門裏宜乎 龍章寵錫 鳳誥重申養志承歡

家有令子勤商課讀族羨賢孫堂開四代玉笋齊班壽祝千秋金疊致
頌是宜延齡添算獲福增榮無何鶴來天上難求九轉之丹人去山頭
空逝三更之夢晚等目極星沉情深雲黯昔則介眉興歌稱觴製錦今
則祖道致祭執紼推車望馬鬣之峨峨幸牛眠之鬱鬱聊陳薄祭敬表
衷言神既匪遙靈其來格哀哉尙

饗

闔邑 搢紳先生祭見亭公淑配謝太孺人誄文

維

同治十一年歲次壬申季冬望後祭日壬申陽中夫愚弟嚴而泰楊枝秀 譚廷坊

劉鳳洲 陳以仁 鄧乃昌 謝應垣等謹以牲醴庶饘菓品剛鬣柔毛之儀致祭於

皇清儲贈八品孺人羅母謝太孺人之位前曰嗚呼扶輿靈淑之氣固

鍾于丈夫亦鍾于閨闈緬維孺人乃歲進士見亭翁之淑配也幼而謹

守壺範鍼術工巧守貞待字足不履東鄰及長而相夫子也伉儷甚篤

讀內則而修髓致潔守中饋而酒食是議事舅姑而敬戒毋違與翁壽

逾古稀教子義方相翁而同有功焉令嗣綱齋翁少年列膠庠食廩餼

任廣文令孫少年採芹名噪膠庠拭目而攀桂調梅皆 孺人德教所

高明錄上卷三
致也又能葆養天和年逾髦鬢介壽稱觴蘭桂繞膝瑞氣盈門行路莫
不侈爲美談矣夫福大則年高德盛則壽長皆自然之理不料氣血失
平膏盲病作望婺星而西墜豈數當如是耶他年翰苑蜚聲爲玉堂金
馬客紫封疊至大慰九泉之下矣茲當窀穸佳辰闔邑祖祭因哀死而
述其行謹具薄酒敬奠一觴魂兮來格鑒我衷腸尙

饗

闔邑 搢紳先生祖祭日榮公誄文

維

同治十一年歲次壬申季春朔越祭日丙申陽中愚弟

楊枝秀 譚廷坊
劉鳳洲 楊文田

鄧乃昌
謝應垣

等謹以牲醴庶饑菓品剛鬣柔毛香燭楮帛之儀致祭於

皇清候選巡政廳貤封昭武都尉

諱炳字

日榮

號豹君羅公府君之

位前曰嗚呼天道終盡造化之常哭死而哀戚友之誼緬維翁者事親

盡孝待衆慈愛教子義方治家廉約壯年棄儀就商交易貨物不貳不

欺故貨財豐滿例授巡政廳及老年退守安居慎言語節飲食杖履優

游所以壽臻耄耄令嗣等各議製錦稱觴爲翁上壽亦料其葆養天和

年逾期頤也誰想膏盲無二豎之災舉步有失足之慮一旦沉疴莫挽

夕陽西墜騎箕尾而上閭閻豈修文有召竟補判官之缺乎所幸令嗣
善承箕裘貿易海外恢大其業績財如山爵加四品蘭孫徇齊敦敏苦
志攻書他年採芹折桂捷步天衢爲玉馬金堂之客斯

紫封皇誥光大門庭翁在九原之下大慰厥心矣今當

佳辰闔邑

祖祭聊述梗概以寄仰慕之情生芻一束薄酒一觴敬奠翁前鑒我衷

腸尙 饗

闔族 紳耆祭瓊贊公誄文

維

同治十三年歲次甲戌孟秋中浣祭日

闔族矜老

建綱 文錦 名先
瑞華 經明 經播

基
雲煥

等謹以牲醴庶饘菓品剛鬣柔毛香燭楮帛之儀致祭於

皇清候選巡政廳

號

瓊贊家先生之位前曰嗚呼光陰易逝如過客之

難留人壽幾何嘆浮生之若夢緬維翁者存心勤儉賦性剛堅遇事明
而有斷接物方而能圓棣萼交輝用垂家範葛藟庇本誼篤宗傳當大
亂而慶初平百廢斯舉遷書室而營家廟一本斯繇力任贊襄俾先靈
之克妥躬為倡率俾義會之能聯凡諸行誼宗族嘉焉固宜天錫之暇
天假之年胡為年纔耳順遽飄飄而登仙是知修短有數時命難知果

全歸之無憾縱長逝以何辭况復祥開子葉秀挺孫枝竚門閭之昌大
洽泉壤而笑嬉夫何生之爲樂夫何死之足悲茲當辰屆五虞愴懷一
族儀陳不腆聊表愚誠三杯薄酌庶幾泉路之通一瓣誠舒用慰陽臺
之望哀哉尙 饗

闔邑 搢紳先生祭用賓公誄文

維

光緒元年歲次乙亥孟夏朔越祭日庚午陽中愚弟劉鳳洲譚廷芳鄧
乃昌楊文田等謹以牲醴庶饑剛鬣柔毛香燭楮帛之儀致祭於

皇清國學生誥封奉直大夫 諱觀光字振陽號 用賓羅老先生之位前

曰嗚呼音容莫覲死別難忘哲人西去搔首情傷惟先生系出名門身
居世胄承父志而善繼善述體親心而克儉克勤其制行也拔俗超群
放眼高於銅柱其謀事也細心密縷鞭心入乎芥舟而且忠厚興家孝
友成性建祖祠興義學置嘗田凡事關乎宗祖文教者慨然身任而不
辭是以光騰璧水名著玉山宜其天錫遐齡人賡壽考夫何微疴偶染

大夢頻醒未屆古稀之期忽應修文之召已矣從此逝矣全而受者竟
全而歸矣然而仰承先烈垂裕後昆二哲嗣英姿卓犖一則致富有方
念天顯而積嘗賑飢一則頭角崢嶸繩祖武而勤經課史他年

紫

誥寵頒黃袍焚贈卽可拭目而俟也先生可無憾於九泉矣際茲窳窳
佳辰吉地花開弟等情聯梓里誼屬親朋悵伊人秋水之思切空谷白
駒之慕祖道致祭虔獻一觴魂兮靈鑒陟降親嘗哀哉尙

饗

本宗祖房衿耆 用賓公誄文

維

同治十二年歲次癸酉孟冬望後戊戌日陽中

鵬高亮榮

為屏為翰

焜耀文錦

等謹

以牲醴庶饘金猪菓品香燭楮帛之儀致祭於

皇清國學生誥封奉直大夫振揚翁靈座之前曰嗚呼光陰易度歲月

難追哀哲人之云亡慨芳徽之未遠緬維 振翁存心仁厚處世和平

三十以前貧苦自甘安分守法四十以後慈祥所發利物濟人重建祠

宇固為祖而為宗普施藥膏並救苦而救難且也置義田惠先孤寡興

義學作育士林種種善行嘖嘖交稱兼之納身軌物訓子義方令長君

仰承家範大慰親心歷萬里之重洋身勞外國授五品之榮職名達朝

階加以次郎學問淹通定成廊廟之器令孫英姿琦璋居然玉筍之班
此固燕翼貽謀宜乎

龍章疊錫也夫福大則年高德厚則壽長何
以服政餘年膏盲病作跨鶴仙遊仰星台而西墜其玉樓之赴召耶抑
氣數之難逃也忝屬員岡支派並集學蒼弟昆屆當三虞敬奠一觴伏
冀來格伏冀來享哀哉尙

饗

闔族 紳耆祭用賓公誄文

維

同治十二年歲在癸酉仲冬己未日陽中

文杰 瑞華 經明
震乾 富天 任飛

等謹以金

猪牲醴菓品香燭楮帛之儀致祭於

皇清國學生誥封奉直大夫振揚公之靈座前曰嗚呼歲月難延兮梭

疾駒亡人壽幾何兮薤露草霜哲人其云亡兮哀慕彌長典型其云亡

兮沒世猶芳緬維 振揚翁存心兮儉而良禔躬兮端且方境先貧而

後富兮驕諂胥忘由親而及疏兮宗族之望聯會事以展親兮以固宗

祊建家祠而收族兮以永蒸嘗茲厚德之能載兮宜鶴算之無疆胡知

非之逾年兮隨鸞飛以高翔豈氣數之難爭兮痛欲問諸彼蒼知生死

其無憾兮年何論乎彭殤嗚呼厥德兮孔彰厥後兮克昌羨喆嗣其代
興兮肯構肯堂並賢孫其岐嶷兮如圭如璋固燕翼之有詒兮開奕葉
而徵祥翳 龍章其疊錫兮達黃壤而生光忝屬一本之親兮涕薦心
香倏當六虞之屆兮望斷臺陽庶幾魂其歸來兮鑒茲一觴哀哉尙

饗

闔邑 搢紳先生祭用賓公淑配楊太夫人誄文

維

光緒二十七年歲次辛丑季望後祭日申酉陽中夫愚弟關燹基譚漢章譚獻仁劉子忠何瑞清等謹以剛鬣柔毛牲醴庶饒菓品香燭楮帛之儀致祭於


皇清疊封一品夫人羅母楊氏太夫人之前曰嗚呼姆儀忽沒搔首情傷徽音克嗣闔範流芳緬 夫人之爲人也居心淑慎秉性慈祥事翁姑而致孝致敬訓兒媳而有義有方課子成名和熊丸以立教事夫能敬舉鴻案以相莊宜其期頤致頌如陵如岡家門日盛寢熾寢昌無何修文有召竟赴仙鄉望婺星之西墜竟騎鶴以辭陽所幸者令孫繞膝

濟濟一堂後先輝映克紹書香含貽自樂點頷生光他日頻膺 鳳詔

疊錫 龍章 夫人亦可拭目而俟也際茲窀穸佳辰執紼道旁祖道

致祭敬奠一觴靈魂降鑒來格來享聊陳薄物陟降親嘗哀哉尙

饗



都中 紳耆祭大新公淑配李氏誄文

維

同治十三年歲次甲戌孟冬下浣祭日

本都耆英堂紳士陳以仁

夏其元夏文駿夏蘭清夏容光謝逢光譚文彬等謹以香燭楮帛牲醴庶饘之儀致祭于

皇清 待贈羅府尊世伯母李氏孺人之靈前曰嗚呼原始要終固知人之生死猶日月之升沉草木之榮悴理固然也緬 孺人之生也本溫和而襄世德內助堪揚凜貞靜以贊家聲慈訓足式紡織是勤奚殊文伯之母徽音克嗣堪媿太妣之風年逾八旬老而彌健歲近大耋壽而且康方期長映蟠桃而並麗永連錦悅而增輝夫何菊色剛殘計維

小陽氣候萱花倏謝忍隨萬葉彫零雖然始爲悲者亦可轉爲慰子列
成均聲稱已騰於上國姪遊泮水桂香定掇乎蟾宮孫曾篤志芸窻長
繇瓜瓞佇看此日牛眠叶吉他年馬鬣榮封卽孺人在九原之下當亦
怡然耳

來嘗尙 饗

余等忝屬世姪際茲初虞之辰用撰鄙俚之句靈其有知來格

闔圍衿耆祭金聲公誄文

維

光緒六年歲次庚辰孟夏上浣祭日乙巳陽中同社弟陳以仁

麥調理
夏蘭清

夏寅清
夏容光

譚思聖
謝逢光

等謹以香燭楮帛牲醴庶饘菓品之儀致祭於

國學生

諱

金聲

號

子石尊社長羅老先生之靈前曰嗚呼光陰冉冉歲

月茫茫歎人生兮若夢悲命數之無常緬維

吾兄之生也存心孝友

賦性剛強入武場而力戰遊璧水而名揚修基堤以防賦食起義會以


設產嘗宜乎期頤未艾髦鬢非長夫何偶占疾病竟入仙鄉所幸子已

象賢定興文教孫尤雀躍應步玉堂則爾日增輝鳳誥疊錫寵章屆茲

安厝寄以悲傷撰言數句奠酒一觴諒

吾兄之掀髯爰跨鶴以鑒馨

香哀哉尙 饗



闔族 紳耆祭曙初公誄文

維

光緒九年歲在癸未孟夏中浣祭日丁酉陽中族弟

亮榮 焜耀 楨
文錦 意天 燮光

天球 任飛 經明 名先 星垣 炳勳 文清 之經
雲煥 其照 名標 之綱 鳳藻 樹勳 基 之章

等謹以金猪牲醴菓品香燭

楮帛之儀致祭於

皇清國學儲贈修職郎

諱炎字毓朝

號曙初宗兄家先生之靈前曰嗚

呼三更月冷半嶺風凄空聞鶴淚樹盡猿啼吁嗟哲逝遠絕攀躋追維

嘉懿情思慘悽在昔聖人曾傳喪側既不成歌且難飽食况屬同宗能

無歎息爰擬俚辭以銘大德繫維 曙翁天姿純厚望重鄉閭聲稱孝

友信格豚魚誠孚童叟克儉克勤善創善守術比陶朱家稱富有教懷

高日... 卷一
燕山義方垂後且其閒居自樂與世無爭談至族事慷慨支撐祖宗廬
墓修復頽傾祖宗營業踴躍經營無怪後人爭傳濟美產擬藍田香飄
泮水頷點蘭孫志承桂子慶集如斯福臻未已理宜上壽坐享榮封奈
何數盡難再躬逢玉樓赴召已渺芳蹤箕星騎去徒想遺容雖臻耳順
不覺心悲人生百歲曾幾何時泰山其頽梁木其萎斯人已去何以奠
之生芻一束薄酒一觴望靈涕泗憑吊悲傷六虞倏屆寸念難忙庶幾
享格鑒此衷腸哀哉尙

饗

闔族 祭任飛公誄文

維

光緒十年歲次甲申季夏上浣祭日庚辰陽中愚兄文錦

焜耀樹勳
燁光名先

錦垣之經
基之清

等謹以香燭楮帛牲醴庶饘菓品之儀致祭於

皇清附貢生例授修職郎

諱任飛

號

解三賢弟之靈前曰嗚呼生而

為英死則留名自古豪傑誰無定評思維賢弟髯髮生平泮芹擷秀藝

苑蜚聲持家有道與世無爭存心忠厚料事精明義會重開同心辦理


宗祠叠建竭力經營排難解紛而不亂投艱遇變而不驚宜其天錫純

嘏壽比老彭三多並至五福咸稱夫何微疴偶染大夢頻醒竟嗟百身

而莫贖偏使兩淚之交橫然而根深者枝葉自茂源遠者流派常清情

高日... 卷一
瞻此日牛眠叶吉卜他年鳳誥增榮愚等聊將薄物用展微誠魂其來
格鑒厥真情哀哉尙

饗



闔圍 衿耆祭任飛公誄文

維

光緒十年歲次甲申季夏上浣祭日庚辰 陽中圍紳陳以仁

夏蘭清
夏容光

夏之楨 夏雄輝 譚文彬
麥調理 謝逢光 夏汝霖

等謹以香燭楮帛之儀致祭於

皇清附貢生例授修職郎

諱 任飛 號

解三賢社弟羅先生之靈前曰嗚

呼自古賢奸憑物色蓋棺定論今猶昔人惟品行少清聲死後沉淪身

閨寂追思賢弟在生時愷惻慈祥兼正直自懷能兢兢人稱故嘖嘖始


則歐採芹繼而授修職遠慮深謀英姿卓識處世和平繼事明晰一鄉

一都是訓是式固宜德邵年高福添壽益胡為染疾弗瘳延醫無力竟

聯仙佛以同遊偏赴玉樓以自適頓使鄰里親朋欷歔歎惜然猶幸美

高田新日方言
卷一
濟鳳毛謀詒燕翼試觀馬鬣榮封預卜龍章疊錫茲屆三虞辰致祭心
悲感奠以清觴薦其時食靈如有知來降來卽哀哉尙

饗



闔圍 指紳祭學孔公淑配譚氏老孺人誄文

維

光緒十一年歲次乙酉季夏祭日辛未同都會弟陳以仁

夏容光
麥調理

夏蘭清
謝逢光

夏之楨
譚文彬


等謹以香燭楮帛牲醴菓品之儀致祭於

皇清儲贈七品孺人尊世伯母羅門譚氏之靈前曰嗚呼原始要終固
知人之生死猶四時之遞遷日月之升沉實草木之榮悴理無足怪者
緬伯母之生也孝順翁姑和睦妯娌徽音克嗣於當年闡範流芳於後
世其間懿德嘉行不勝枚舉故年踰八旬壽近大耋方期宗登上壽瑞
作頤朝無何婺沉寶光空嗟琴在所可慰者孫賢子肖頭角崢嶸桂馥
蘭芳家聲不振異日馬鬣榮封龍章疊誥卽伯母在九泉之下應亦怡

然耳余等忝屬係弟際茲虞辰謹控數言用伸微忱靈其有知來格來嘗

哀哉尙

饗



要明五局紳士三虞祭綱齋公誄文

維


光緒十二年歲次丁亥孟夏望後祭日甲寅陽中弟譚廷坊何雲鶴曾
端文馮鑑秋麥森泉等謹以牲醴楮帛金猪柔毛庶饘菓品之儀致祭
於

覃恩敕授文林郎太常寺博士歷任長樂乳源教諭廩貢生 諱文錦號
綱齋羅公之位前曰惟

公奇才卓犖壯志飛揚家傳孝友仕著賢良三山保障兩縣棟樑茲當
溘逝遐邇感傷凡諸同事倍切倉皇迴思往日梓里滄桑收燼圖復惟
公尤強仗三尺劍復百里疆十年血戰邑賴以康匪公癡性曷爲之倡

緬公之識慎密安詳緬公之度括達包荒緬公之績婦孺難忘名真不
朽澤定彌長昔覘公澤今祝公昌生芻薄酒致奠於堂勿棄不腆伏冀
來嘗尙

饗



闔邑摺紳祭絅齋公誄文

維

光緒十三年歲次丁亥孟秋望後祭日庚辰陽中愚弟楊寶琛楊以仁謝應清譚廷坊等謹以牲醴庶饘菓品香帛之儀致祭於

皇清敕授文林郎太常寺博士歷任長樂乳源縣教諭廩貢生

諱

文錦

號絅齋羅公之位前曰嗚呼望迷砥柱魂返仙鄉人琴遐躋於雲霧山木倏隕於風霜我懷

絅翁想見山高而水長我念

絅翁當知積厚而流光蒼山毓秀青竹流芳居常緯武經文洞折衝於樽俎遇難運籌決策果恢復乎土疆作長城於兩縣挽狂瀾於一方十

三年血戰山河勳勞卓著七萬戶生還故里福蔭難忘德既敷施於無
外理合壽考而永康奈九夏偶乖玉燭二豎竟入膏肓柯忽夢夫入穴
杖獨曳於高堂然其成名猶積善自爾奕禩堪盛揚

先生樓召箕騎遊九京而罔歉令嗣芹香藻茂卜五世之其昌此際值
丁艱而衣素異時登甲第而焚黃功德延綿於雲裔榮封疊錫於朝章
弟等生同桑梓義重膠庠悵流風之韻渺惟洒淚而神傷際茲東郊發
軻祖道傾觴情慘悽而乍咽語囁嚅而未詳生芻蕘奠精魂來嘗尙

饗


省城豫章公所祭綱齋公誄文

維

光緒十三年閏四月念七日廼

覃恩敕授文林郎太常寺博士歷任長樂乳源教諭廩貢生綱齋羅公
三虞之辰陽中宗太坤葆熙蓉舫葆祺儔鶴因輓之曰恭惟大德積厚
流光昔平邑亂名重鄉邦栽培後學澤被膠庠同倡祖宇木本無忘惟
忠惟孝壽卜無疆忽登仙界慨慕彌長爰將酒醴薄薦芬芳洋洋在上
來格來嘗嗚呼哀哉尙

饗



闔族祭綱齋公誄文

維


光緒十三年歲次丁亥孟秋下浣祭日庚辰陽中宗弟星垣等謹以香燭楮帛牲醴菓品之儀致祭於

覃恩敕授文林郎太常寺博士歷任長樂乳源縣教諭廩貢生諱文錦

號綱齋羅公之靈前曰嗚呼

綱翁經學精通父作子述克振家風公明勤慎望重德隆玉城恢復莫與爭功解紛排難在局秉公凡我族類更荷帡幪建祠修墓尊祖敬宗纂譜助產盛業難逢宜邀天眷壽考無窮年逾六十克善厥終誼關同氣淚洒溶溶薄陳不腆祖道城東魂其來格萬福攸同尙

饗



闔邑 搢紳先生祭炳南公誄文

維

光緒十五年歲次己丑季冬中浣祭日戊子陽中愚弟譚廷坊李瀚鋈

陳以仁楊逢源等謹以剛鬣柔毛牲醴庶饘菓品香帛之儀致祭於

皇清誥授中議大夫直隸候補運同 欽加三品銜 賞戴花翎 諱楨

字敬修 號炳南羅公之靈前曰嗚呼傷哉雅範云亡哲人其逝搔首情


傷緬

翁爲人忠厚和平處己勤儉接物公誠致富有術用財有方鄉閭誌美
友戚沾光銜列三品績著一鄉以公厚德宜其寢熾寢昌無何大數難
逃病入膏肓修文有召鶴駕仙鄉所幸令哲聯鑣競爽 媿美義方他

年採芹折桂定卜顯揚旣膺 鳳誥疊錫 龍章 翁於九泉亦且無
憾際茲窀穸執紼道旁祖道致祭敬奠一觴靈魂來格陟降親嘗哀哉

尙

饗



闔圍 摺紳祭雲煥公誄文

維

光緒十七年歲次辛卯季春上浣祭日壬申陽中社同弟陳以仁

夏蘭清
譚駿德

夏容光
麥槐森

等謹以香燭楮帛庶饑之儀致祭於

皇清恩授八品銜邑廩士卽晉贈 倬章翁尊社長羅先生老大人位

前曰嗚呼自古生死之感聞者莫不勝悲况朋友誼重情親一旦幽明
永訣其悲悼更當何如耶緬維公之生也孝友性成文章夙擅少讀父
書彌切青燈之志壯遊泮水類生彩筆之花食廩餼則名列優等修圍
隄則恩邀寵錫且也興義會於通都千秋沾其利賴廣營產於巨族萬
載仰其芳型以德若此固宜天假之年壽享期頤者矣夫何微疴一染

竟盧醫而莫效遂與世而長辭嗚呼公已逝矣今不復覩矣所可慰者
令嗣篤志芸窻自當鳳毛濟美他年慶綿瓜瓞定卜麟趾呈祥卽公在
九原之下亦當怡然矣屆茲三虞聊撰蕪詞以彰厥德謹致永訣之意
用申執紼之儀嗚呼哀哉尙

饗

闔圍祭任飛公淑配甘氏誄文

維

光緒十七年歲次辛卯季春中浣祭日乙亥 陽中圍紳陳以仁 夏蘭清 夏容光

夏雄輝 謝逢光 譚文彬 夏汝霖 譚炳然 等謹以香燭楮帛牲醴庶饘菓品之儀致祭於

皇清例授八品孺人羅府甘氏老孺人之靈前曰嗚呼一人之生死猶

萬物之榮枯此固氣數之使然而不能強致者也緬維 孺人系出名

門身歸望族孝順姑嫜和睦妯娌相夫有道何殊諸葛之妻教子有方


豈異歐陽之婦是宜延年益壽身其康強夫何未近古稀致歎星沉寶

婺稍逾耳順興嗟草謝殘萱然而令子襟懷灑落賢孫頭角崢嶸異日

墓左榮封亦可大慰 孺人於九原矣茲當安厝之日用備致祭之儀

聊撰俚言數句爰奠清酒一觴魂其來格鑒此衷腸哀哉尙

饗



闔邑搢紳祭綱齋淑配楊氏誄文

維

光緒廿八年歲次壬寅孟春中浣越祭日庚午陽中夫愚姪麥錫良黃
永康關燮基譚漢章等謹以香燭楮帛牲醴菓品之儀致祭於

敕授八品孺人

誥授五品宜人

儲贈七品孺人羅世伯母楊老孺人之位前曰嗚呼雨霖霖兮日暮月
冷冷兮雲迷望婺星兮不見心惓惓兮神馳嘆彼蒼兮難問傷世道兮
難知溯孺人兮淑德立後世兮母儀守馬倫兮七誠備四德兮靡遺度
溫恭兮婉婉心淑慎兮慈悲相夫子兮戒且資內助兮才奇成大功兮

恢復巾幗壯兮鬚眉闔三坊兮士庶方共祝兮期頤胡修文兮有召竟
返駕兮瑤池幸桂枝兮挺秀掇科第兮巍巍雖孺人兮長逝亦心樂兮
神飛聞山陽兮寒笛效向秀兮淒淒薦生芻兮道祭淚汕汕兮陳辭尙
饗

古詩經卷六

闔邑搢紳祭五笙公誄文

維

光緒廿六年歲次庚子閏八月下澣越祭日丁卯陽中愚弟譚漢章黃永康楊建中區浩泉等謹以金猪牲醴香燭楮帛之儀致祭於

皇清例授修職郎候選儒學郡廩貢生

諱之經號

五笙羅公之位前而

誄之曰嗚呼自古豪傑多感慨無裨於世有誰欽一介之士不得志古道在人今照臨非都人士之所希孰使人歔歔不禁嗚呼一生一死亦大矣惟

公一死卓留名雖然家居無奇績所舉數事見生平慷慨好施且勿論重新 文廟大經營設膏火以贍寒士振興義學此干城城南廣建橋

常在津洧濟人逾鄭卿以公實德興實行天應遠大其前程終於廩貢
而早逝是真造物難爭衡嗚呼莫爲之後盛不繼莫爲之前美不彰以
公世業屢膺乎銓選及身無玷乎書香季弟列三升之典後昆留四美
之光公之志事將有屬何憾返旆於仙鄉邑人倦倦懷秋水伊人不見
在何方相與陳辭而薦酒精魂髣髴其來享哀哉尙

饗

闔邑搢紳祭五雲誄文

維

光緒廿八年歲次壬寅孟冬上浣祭日庚寅陽中世愚弟麥錫良黃永

康關燮基譚章漢等謹以香燭楮帛牲醴菓品之儀致祭於

皇清誥授文林郎揀選知縣甲午科舉人諱之章號五雲羅公之位前


曰惟

公性情純樸雅量汪洋治家肅睦任事堅剛事親以孝孺慕偏長事長
以敬悌道益彰前登雲道遐邇名揚辦團興學士庶難忘城南廣建澤
遍橋樑憶昔邑中鬢序蕪荒

公與乃兄仔細參詳慨捐鉅款爲衆之倡重新廟貌冠冕喬皇盛業不

朽馳譽膠庠方期勿藥弗祿爾康茲聞溘逝倍覺神傷祖祭道左薄獻
壺漿伏冀來格鑒我清觴尙

饗



二十二世偉卿公賢配謝太淑人誄文

維

中華民國十四年歲次乙丑越祭日戊子夫世


愚弟譚漢章劉鑑冰區

溢樵楊賡鏞等謹以香燭楮帛庶饑牲醴菓品之儀致祭於

民國顯妣清誥封淑人羅母謝太淑人之靈前曰惟我

太淑人寶樹世家玉臺麗質習莊姝之矩度班誠逾昭亶澄粹之圓輝
郝型自微平居度己若繩儉以葆泰接人如緹惠能好施本魯姑行義
之心銅山可徙擴鄭母贍姻之志金穴都移西江大水連年先後兩次
助賑宜夫壽安坊建天語榮褒何期寶婺星沉瑤池月暗茲當窀穸爰
具椒漿仰祈靈貺來格來嘗尙

饗



闔邑親友搢紳先生祭炳元公副孺人李氏誄文

維


中華民國二十年歲次辛未仲夏中浣祭日壬子陽中夫姻晚生楊卜
西等謹以牲醴庶饘菓品剛鬣柔毛之儀致祭於

前清副孺人敕贈八品孺人晉贈太老孺人羅母李氏之位前曰嗚呼
寶婺光沉兮端節逢剛福星朗照兮懿範悠長一息尙存兮子望回陽
三生有幸兮孫返登堂家人大集兮安首東床仙侶遽招兮躡足西方
噫逾耄將耄兮壽數難量肖子賢孫兮位祿克當親朋共仰兮婦孺稱
揚窀穸今歸兮魂魄相安晚等分屬親誼薄薦馨香尙祈來格鑒此衷
腸尙

饗

加言

一六



闔族紳耆祭炳元公副孺人李氏誄文

維

中華民國二十年歲次辛未仲夏中浣祭日壬子闔族紳耆

佐卿捷先麗川
祝銘仁樞學平

康傑等謹以牲醴庶饗香燭楮帛之儀致祭於

前清副孺人敕贈八品孺人晉贈太老孺人羅母李氏之靈座曰緬維

我孺人溫如玉山毓秀潤似滄水鍾靈不必姆儀素嫺自然婦道克成

况復仁慈者壽樸實其誠宜乎齒參耄耄之高燕居適意日觀兒孫之

貴鶴邑揚名方謂遐齡未艾厚福長寧無何玉樓赴召之日忽爾寶婺

沉沒其星噫也知生死原有定當富貴而不驚佐等分居親屬義盡親

情是用生芻一束薄酒三升鞠躬致敬著手薦馨尙祈鑒臨是奉銘感

不勝尙

饗



二十二世錦垣公誄文

維

民國二十年歲次辛未五月十八日親友

羅一清
黃冠卿
林祝三

等謹以香燭菓品庶饘

之儀致祭於

錦垣公之靈前曰嗚呼修德獲報爲善必昌古人垂訓其語皇皇維我
耀翁實足當此道積厥躬令聞不已言公首行孝事雙親仰承色笑老
而彌殷言公待人摯誠忠厚和藹可親衆樂爲友言公任事毅力精心
無論巨細定必親臨言公授徒循循善誘啟迪有方人瞻山斗至于訓
子與及治家惟勤惟儉屏絕浮華此外芳規尤難盡告無怪生平陰食
其報少年得志庠序蜚聲延及壯歲婦孺知名晚景更佳家稱富有蘭

桂騰芳一門實厚今雖仙逝殊屬可欽富貴壽考遠近難尋生等或屬
鄉鄰或附葭末或本世交或承衣鉢聞公之耗嘆公之賢其人其德受
福宜然爰采生芻載尋芳泚凌山之蒿滄溪之水薄陳一束聊醅全甌
魂兮來格無間明幽伏維尙

饗

